

САИД
АҲМАД



Ч У Л Б У Р Г У Т И

Чўл бургутини излаб Олтиариқдан Ёзёвонга отда жўнадим. Ҳали қуёш ботмаган, унинг кечки қизғиши нурлари барглари сарғайган ўрикларни, терак учларини ловиллаб ёндираётгандек. Осмон кўм-кўк, уфқда худди атайин бўяб қўйгандек қип-қизил булут парчаси судралиб юрибди.

Канал кўпригидан ошиб, чўл томонга жиловни бурдим. От негадир тихирлик қилиб, юрмай туриб олди. Жонивор бир-икки қамчидан кейин ҳам олдинга жилиш ўрнига орқасига тисарилиб, тайсалларди. Жаҳл устида қамчи босмоқчи бўлиб қўл кўтарган ҳам эдимки, кимдир қичқирди:

— Ўғлим, жониворни суғоринг. Кўрмаяпсизми, сувга интиляпти.

Ўгирилиб қарадим. Сув лабида белбоғига юз-кўзини артаётган олтмиш ёшлардаги қарияга кўзим тушди. У шундоқ ювош отни бесабаб қамчилаганимга ачингандек, илдам юриб келиб жиловдан олди. Пастга тушдим. У от жиловидан ушлаб қирғоқча етаклади. От олдинги оёқларини лойга ботириб, тумшуғини сувга тиқди. У ҳар замон-ҳар замонда

бош кўтариб менга қараб қўяди-да, яна сувга интилади. Унинг бу ҳаракати чанқаганимни билмадинг-а, деб таъна қилаётгандек туюлди. Жаҳл устида қамчи босганимда эти дириллаб кетганини эслаб кўнглим ранжиди.

— Йўл бўлсин, сафарингиз қай томонга?— деди чол отни қайтариб чиққач.

— «Пахтакор»нинг «Партизан» участка-сига.

— Ундоқ бўлса йўлни ўнг томонга солинг.

Чолга миннатдорчилик билдириб, йўлга тушдим. Атроф бий дала. Қуёш ботиб поёнсиз чўл бирдан ҳувиллаб қолди. Уфқдаги бояги қизил булут аста кенгайиб, бирпасда бутун осмонни эгаллаб олди-да, тақир чўлни қизғимтири хира парда орасига ўраб қўйгандек бўлди. Қимсасиз чўлда чўл бургути билан учрашув ҳақида ўйлаб кетмоқдаман. Назаримда чўл бургути деб аталган киши юзларини шамоллар қорайтиргаи, яқинида турган одамга ҳам худди олисдан қараётгандек кўзларини қисиб, бўйини бир томонга эгиб боқадиган, бирор билан кўришгани қўл узатганда шамолга қарши учишга ҳозирланиб, қанотини ёзиб олдинга интилиб турган бургутга ўхшаш баҳайбат бир киши бўлиб кўринарди. Менинг бу фикримни тасдиқлаётгандек, от бошини силкитиб қўяди.

Киссамдан папирос олиб ҳарчанд гугурт чақаман десам ҳам эплай олмадим. От дупурини эшитиб жиловни тортдим. Юз қадамлар чамаси орқада отлиқ келарди.

— Гугуртни ҳовучингизнинг орасига олиб чақинг, йигит. Чўл шамоли ўжар бўлади.

Чолни танидим. У бояги менга йўл кўр-

сатган киши. Отларимиз бараварлашганда жиловни бўш қўйиб юбордим.

— Хизмат, ўғлим? Сизни Ёзёвонга қайси шамол учирди?

— Чўл бургутини кўргани келяпман.

— Ҳа! Кўрса арзийдиган йигит. Бургут деганча бор.

— Танийсизми уни?

— Бу атрофда уни танимайдиган одам йўқ. Бу чўлларда у ёнбошламаган тепа, отининг туёғи тегмаган сой қолмаган. Олов бола. Чўлда от чоптириб келаётганини кўрсангиз тўнининг икки бари шамолда ҳилпираб, худди бургут қанот қоқиб учиб келаётгандек. Файратини айтмайсизми, қони томирдан тошиб чиқиб кетаётгандек. Нимага қўл урса гуллатади. Қўли гул деб шуни айтса бўлади. Каналнинг бериги томонидаги ерларга кўзингиз тушдими? Ҳа, балли. Бургут обод қилган. Ҳозир ўша ерга колхоз клуб қуряпти. Жуда гаштли ер бўлган-да. Бургутнинг йигитлари шу атрофдан эллик гектар ер очиб, мевазор қилишди. Уч йил бўлди. Ҳа, уч йил бўлди, чўлнинг қоқ ўртасидан ер очгани бола-чақаси билан чиқиб кетганига.

— Бургут асли шу ерлик йигитми, ё кўчирмами?

Чол анча вақтгача жим қолди. Туёқ товушига қулоқ солиб бир муддат йўл юрганин миздан кейин саволимга жавоб қайтарди:

— Бургут шу ернинг боласи. Ёшлигига ҳам ўт-олов эди. Фронтга кетмасидан олдин қишлоқдаги Ойниса деган бир қиз билан дон олишиб юрган эди. Иккови аҳду паймон қилишиб гапни бир жойга қўйишган йили уруш

бошланиб, Бургут фронтга кетди. Шу кетғанча ундан хат-хабар бўлмай қўйди. Қиз кутиб-кутиб, охири ўзимизнинг қишлоқлик Нуъмонжон деган болага тегди. Орадан сал ўтмай уруш тугаб Бургут қайтиб келди. Қараса қиз эрга теккан. У чамадонини самоварда қолдириб, тўппа-тўғри Нуъмонжоннинг уйига бостириб борди. Эр-хотин ҳовлидаги сўрида чой ичиб ўтиришган экан. Бургут, ҳе йўқ, бе йўқ, қизнинг қўлидан ушлаб кўчага етаклаб қолса бўладими, кўчага йифилди одам, йифилди одам! Қариялар насиҳат қилишди, қани энди унга гап уқдириб бўлса, йўқ. Ўжарлиги тутуб, тавба, икки ярим ойлик келинчакни ўз уйига етаклаб кетса бўладими! Шу десангиз, қиз ҳам жон деб турган экан, олдига тушиб пилдираб кетаверди. Бир ҳафтагача Нуъмонжон Бургутнинг уйи атрофида ўралашиб юрди. Эплолмади. Районга бориб, у ёқ-бу ёққа арз қилмоқчи бўлди, бўлмади. Зўрликни қаранг-а! Қишлоқчилик эмасми, Нуъмонжон соддалик қилиб, келин билан ҳали загсдан ўтмаган экан. Унинг гапига ҳеч ким қулоқ солмади. Тавба!

— Ӯша кезлари Бургут босар-тусарини билмай, медалларини жаранглатиб ўтганинг ўроғини, кетганинг кетмонини олиб юрди. Йўқ, сал фурсатда инсофга келиб, ишга шўнғиб кетди. Аммо, лекин, димоғ баланд. Бирор буюрган ишни қилмайдилар. Бригадирни писанд қилмай, бир чеккада ўзига ер ажратиб олиб, кетмон чопиб юрди. Кетмон қанақа денг, темирчининг миясини ачитиб, тепасида туриб баркашдек қилиб ясатиб олган. Раисимиз эслик бола. Алдаб-сулдаб Бур-

гутни йўлга солди. Ўзи ҳам яхши гап билан илонни инидан чиқазадиган хилидан. Колхоз қизлари бир кун қизиқчиликка кетмонининг сопига исриқ боғлаб кетишибди, деган бир гап ҳам бўлган эди, чоғимда. Ўша йилиёқ Бургут колхозда ном чиқариб, Икромжоннинг ўрнига бригада бошлиғи бўлди. Қеласи йил орден олиб қурултойга ҳам бориб келди. Ёпирай, қурултойдан келди-ю, бошқа одам бўлди қўйди. Чўлга от солгани-солган. Ўзига ўхшаган йигитларни ҳам чўлга бошлади. Раббимсан, деб чунонам кетмон чопишдик, ҳашпаш дегунча аллақанча ерни чўлдан юлиб олишди. Шу, назаримда Бургутнинг юраги танасига сифмаётганга ўхшайди. Чўлни сиксам, танобини тортсам, дейди. Ғайратингга балли-е, азамат.

Ўтган йили гектаридан қирқ икки ярим центнер пахта берган бригадалар Бургут ер очган ўша чўлдан обрў топишди-да.

— Нуъмонжон нима бўлди, кейин уйлашдими?

— Ҳа, Бургут ўғил болалиқ қилди. Тўйинга иккита бўрдоқи етаклаб борди. Қуёвновкарда ҳам Нуъмонжоннинг ёнида ўтириб, роса қизиқчилик қилиб, одамларни кулдирди. Ҳозир Нуъмонжон Бургутнинг бригадасида.

— Хотинини ундан қизғанмайдими?

— Авваллари қизғанарди. Ҳозир бир ўғил, бир қизи бор. Нуъмонжонга қуда бўламиз деб, тегишгани тегишган.

Чўл ўртасидаги йўл иккига бўлинниб, чол отининг жиловини тортди.

Чолнинг жилов тутган ўнг қўлининг икки-

та бармоғи қўшалоқ битиб қолганини кўриб қолдим.

— Ўғлим, мен бу ёққа кетаман. Энди йўлни отнинг ўзи топиб кетаверади. Хайр, ўғлим. Бургутга мендан дуо деб қўйинг.

Чол билан хайрлашдик. Тўппа-тўғримдан ой кўтарилиди. Бояги қизил булутлар энди сарғимтил тусга кириб, кўз олдимда рангини ўзгартираверди-да, бирдан синкага солгандек зангори рангга бўялди. Ой жуда тез баландлаб, ҳамма ёқни ҳавои бир тусга ғарқ қилди. Ерга урса кўкка сачрайдиган ажойиб табиатли чўл Бургути билан учрашишга ошиқдим. Бечора от яна бир марта қамчи еди-ю, халоскори чолдан ажраганига афсусланган-дек бошини сарак-сарак қилиб, илдам юриб кетди. Шу ой нурига ғарқ бўлган чўлларда Бургут парвоз қилиб юргандек, ой ҳам унинг қадами теккан ерларни кўз-кўз қилмоқчи бўлгандек, янада равшанлашаётганга ўхшарди.

Бургут ҳақида китоб ёзиб, унинг бутун қилиқлари, нуқсон ва фазилатларини тасвирлаб, мана шу бепоён чўлнинг пешонасидағи асрий шўрни ювиб, зўр ҳосил олишига ўқувчини ишонтириб бўлармикин?

Шундай хаёллар билан «Партизан»га етганимни билмай қолдим. Ҳали атрофига девор олинмаган янги уйда ёши ўттиз бешларга борган, ниҳоятда кўҳлик бир жувон мени кутиб олди. Бу Бургутнинг хотини эди.

— Пунктдалар, пахта жўнатяптилар, ҳализамон келиб қоладилар.

— Яхши уй бўпти, атрофга девор олсанглар жуда шинам ҳовли бўлади,— дедим.

Жувон кулди.

— Раҳимжон акангиз шундоқ катта чўлга сиғмайдилар-у, ҳовлига девор олармидилар.

Даҳлиздан оёқ товуши келди. Бирпастдан кейин паст бўйли, озғин, кўримсизгина бир йигит кирди. Бу йигит Бургутни йўқлаб келган гумон қилиб, йўл юриб чарчаганимдан у билан бош ирғиб енгилгина саломлашиб қўя қолдим.

Жувон гап қотди.

— Раҳимжон ака, меҳмон сизни йўқлаб кептилар.

Гапнинг очиғини айтсам жуда ҳам ҳафсалам пир бўлди. Йўл бўйи минг хил хаёлларга бориб, афсонавий паҳлавонларга ўхшатиб завқланиб, ҳавас қилиб келган Бургутим ҳар куни кўриб юрган оддий қишилардай, жуссаси ҳам, юзи ҳам, кўзи ҳам, қараашлари ҳам оддий, пачаққина бир йигит бўлиб чиқди.

Бургут менинг кайфиятимни сезиб турган экан шекилли, қўл бериб кўришаётганда панжаларимни шундай сиқдики, бургут чангалига тушган жўжадек чийиллаб юборишимга оз қолди.

— Жуда соз бўпти-да келганингиз, гаплашиб ётамиз. Бугунча иш битди. Энди отамлашсак бўлади.

Ош устида гапга солсам, ўзи ҳақида унчамунча гапириб берар деб ўйлаган эдим. Йўқ. У жуда камгап одам экан. Ўзи ҳақида бир оғиз ҳам гапирмади. Фақат «Дайди» кинофильмининг иккинчи сериясини кўрмагани, у ёғида нима бўлишини билмай қолганини афсусланиб айтди.

— Чўлга қачон келганингизни, қандай қи-

либ чўлни обод қилганингизни айтиб берсан-
гиз.

У кулди. Ориқ панжалари билан пешона-
сини уқалаб, кўз қири билан менга қараб
кўйди.

— Қандоқ десам бўларкин? Шундоқ чўл-
га чиқди-гу, бир томондан трактор солиб,
кўпчилик бўлиб кетмонни чопиб кетавердик.
Шу!

Унинг бу гапидан камтарлик қиляпти деб
ўйладим-да, яна сўрадим:

— Ахир, шу ишлар осонгина бўлмаган-
дир?

— Меҳмон деган унақа сергап бўлмай-
ди,— деди у айёрча кулиб.— Эртага ўзингиз
кўрасиз. Болалар айтиб беришади. Чарчаган-
дирсиз, ётинг.

Ундан ўзи ҳақида тайинли бир гап олиш
қийин эканлигига ишонганимдан кейин, ёс-
тиққа ёнбошладим. Чўл бургути чироқни па-
сайтириб нариги уйга чиқиб кетди.

Назаримда у уйдан чиқди-ю, қанот қо-
қиб, ой нурида яшнаб ётган чўл осмонига
учиб кетгандек бўлди.

Үйқум қочди, фикр-хаёлим чўл бургутида.
Наҳотки, оддий, кичкинагина жуссада бургут
қалби, бургут парвози бўлса. Наҳот, у бур-
гут етолмаган фазоларда уча олса.

Шу кеча чўл тонги ёришиб келаётган суб-
ҳисодиқда, улуғ ниятлар инсонни улуғ истиқ-
бол сари қанотлантиришига, чўл бургутига
ҳам қанот берган мана шу ниятлар эканига
иқрор бўлдим.

Эрталаб нонушта вақтида Нуъмонжон
келиб қолди.

— Ҳа, Тўппонча, нима қилиб ивирсиб юрибсан?

— Машина қайси участкага борсин? Шуни сўрагани келгандим.

Бургут унинг қўлига бир пиёла чой тутқазди.

— Ҳали тайинлаган эдим-ку.

— Ҳожимуқон ҳали йўл очмаган экан, механик бормайман деяпти.

Уларнинг суҳбатидан ҳеч нарса тушунмадим. Фақат Бургут то нонуштагача чўлни шамолдек гир айланиб келганини сездим, холос. Нуъмонжон кетди. Биз Бургут билан ташқарига чиқдик. Қеча қоронғида келиб чўлнинг нималигини билмаган эканман. Үн учта янги оқ иморат. Нарироқда тепаси шийпонлик идора, уйлар олдидағи қатор экилган ёш теракларнинг барги қаҳрабодек сап-сариқ. Артезан қудуғидан чиқарилган сув бўй баравар баландликдаги қувурдан шилдираб оқиб ётибди. Ундан нарида тепаси толь билан омонатгина ёпилган сарой ичига селитра тўкиб қўйилган, икки-уч бочка керосин, қопланган цемент, ғишт, тахта, ходалар уйиб ташланган.

Шийпон олдида марказий Фарғона степ-торгининг автолавкаси турибди. Унинг бир филдираги ўрнига ғишт тахланиб, ўқига тиргович қилиб қўйилган. Оқ халат кийган сочувчи вағиллаб турган примус устида буғ пуркаётган мис чойнакка чой дамлаяпти.

Бургут лавкага бош сүқиб қаради. Полкаларда сон-саноқсиз ароқ, винолар, пачка-пачка майда туз териб қўйилган. Қизларнинг сочига тақиладиган ҳар хил лента, устига зар

қопланган сигара, елпуғич, упа, фотоувеличитель каби моллар тўлиб-тошиб ётарди.

Сотувчи нимадир демоқчи эди, Бургут қўл силтади.

— Дўконни беркитинг. Туз чўлда ҳам кўп. Упа қўйишга хотинларнинг ҳозир қўли тегмайди. Елпуғичсиз ҳам шабада бўлиб турибди. Ароқни бўлса кечқурун майдалашармиз.

Бургут идора томондан келаётган Нуъмонжонни имлаб чақирди.

— Бу кишини ола кет. Дўконни кечқурун очади. Бир грамм терса ҳам ҳарна-да!

Бургут хижолат бўлгандек қошини кериб менга қаради.

— Меҳмон, ишимиз қизиқ бўлди-ку. Сал bemavutroq келиб қолдингиз-да. Уйимиз батта бўлгани билан, пахтамиз олти километр нарида. Шу турган еримиз келаси йилга бориб чўлнинг центри бўлади. Мен билан юрсангиз чарчаб қоласиз. Яхшиси Тўппонча полвон билан кетаверинг. Ҳожимуқоннинг ерида учрашамиз.

Бургут отга миниб қайгадир кетди. Биз Нуъмонжон билан йўлга чиқдик.

От-арава, машина юравериб шиббалаб юборган текис йўлдан сал юрганимиздан кейин орқамиздан сотувчи йигит ҳаллослаб етиб келди. То у келгунча гапимиз қовушмай турган эди. Гапни нима ва кимдан бошлишимни билмай жимгина борардим. Танишибилиш йўқ. Бургутдан гап айлантирай десам, Нуъмонжоннинг кўнглига қаттиқ ботмасмайкан деб хижолатда эдим. Толеимга сотувчи сергапгина йигит экан. Йўл бўйи оғзи тинмай

степторгнинг инспекторидан шикоят қилиб борди.

— Нафси бузуқ одам. Жиндак чўзиб қўй-масанг молнинг яхшисини ололмайсан. Ака, ўзингиз ўйланг, кичкина дўкон бўлса, харидорнинг сони йигирмадан ошмаса, бозор яқин бўлмаса, ахир бола-чақалик одаммиз.

Нуъмонжон юмшоқ кўнгил, қиздеккина йигит экан. Унинг қадди-басти, хатти-ҳаралатлари деҳқондан кўра сартарошга кўпроқ ўхшаб кетарди. Оёқ олишлари енгил, гапи ҳам мулоим, қалин қора қошлари остидаги сарғимтил қўй кўзи ҳамиша кишига кулиб тургандек. Унинг шу топда ёнимда пилдираб бориши чўлда кетаётган ожиз чумолига-ўхшаб, сира манзилга етолмайдигандек кўринарди. Бунинг нимаси тўппончага ўхшайди, тавба.

Узоқдан кўм-кўк тутун кўринди. Бу тутун бир зумда тарқаб, унинг ўрнида ёнбошлаб қолган терим машинаси кўринди.

— Бир бало бўпти,— деди Нуъмонжон бесаранжом бўлиб.— Бургутдан балога қоламиз, қани, югуринглар!

Унинг мулоим қўй кўзлари думалоқлашиб бўрининг кўзига ўхшаб кўкимтил тусга киргандек бўлди. У чўл ўртасида шамолдек олдинга югуриб кетди. Боя чумолидек увол кўринган қиздек йигит, энди кийикдек ел қувиб олдинда учиб борарди.

Биз ҳаллослаб яrim йўлда қолиб кетдик. Кечаси кўп чекканимдан бўлса керак, юрагим гупиллаб уриб, тилим оғзимга сиғмай қолди.

— Тўппончанинг ўқига ўхшайди-я! — дея

олдим энтикиб.— Тўппонча полвон деганича бор экан.

— Бу Бургутнинг қўлига тушган қуён — шер, чумоли — фил бўлиб кетади.

Машина тўхтаган ерга етиб келдик. Ёмғир суви ҳалқоб бўлиб қолган чуқурликда машина нинг бир ғилдираги ботиб қолибди. Механик ҳайдовчи ярим соатдан бери чиқазолмай, моторни гувиллатавериб ёнилғини тугатаёзган экан. Нуъмонжон сотувчини орқага қайтарди

— Аравада ёнилғи олиб кел!

Йигит энсаси қотгандан гарданини қашиб, камҳафсалалик билан орқага қайтди. Нуъмонжон эса этигини шалоплатиб ботқоқка тушди-да, хижолат бўлгандек менга қарди.

— Меҳмон, кемага тушганинг жони бир. Қани, потинкани ечинг. Бир ҳа-ҳалашиб юборайлик.

— Тиззадан лой кечиб унинг ёнига бордим. Нуъмонжон ингичка оёқларини қадаб, елкасини машина қанотига тиради.

— Қани, ҳайда!

Мотор гуриллаб, машина олдинга интилди. Интилди-ю, кейинги чап ғилдираги турган жойида пилдираб айланиб, афти-башарамга лой пуркаб юборди. Нуъмонжон бўғиқ овоз билан яна бир марта «ҳайда», деб машина нинг чап қанотини азот кўтарди. Машина орқасига тутун қайтариб, олдинга лапанглаб силжиди.

Бу йигитда шунча куч борлигига ҳайрон қолдим. Ахир, у шунча оғир машинани елкаси билан итариб, йўлга чиқариб қўйганини ўз

кўзим билан кўриб турсам ҳам бунга сира-сира ишонгим келмасди. Наҳот, шу увоққина жуссада шунчалар катта, ишониб бўлмас паҳлавон куч яшириниб ётган бўлса. Буни «Тўп-понча полвон» деб бекорга айтмаган эканлар.

Нуъмонжон тўнининг бари билан юз-кўзи-га сачраган лойларни артиб бўлиб, менга ил-жайиб қаради.

Унинг кўзлари бирар мулойим, бирар ёқимли. Ҳар қандай тошюракни ҳам эритади-ган, ажойиб кўзлар эди.

Бу йигит мен тасавур қилган чўл йигит-ларига сира ўхшамасди. Нозик бармоқлари фақат дутор чертишга, сабза урган мўйловлари остида кулишга ҳозирланиб турган лаблари фақат жонон қизларнинг юзидан бўса олишга яратилгандек кўринарди. Кишининг ташқи қиёфаси баъзан интилишларига, фикр-ўйларига қанчали қарама-қарши бўлишига энди ишондим.

Машина ортидан эргашиб тайин қилинган ерга келдик. Оппоқ очилиб ётган ғўзалар орасидан «Алф-Лайло» даги кўзачадан чиқ-қан Аҳраман девдек баланд, ҳар яғринига биттадан одам минса бўладиган ўттиз бең ёшлардаги норғул йигит машинага қараб келарди. Унинг узун чакмони дарахтга шолча ёпиб қўйганга ўхшарди. Қош ва киприклари сариқ, аммо ўзига жуда ҳам ярашиб тушган мўйлови негадир локдек қоп-қора эди. Мўйловини бўяса керак деб, дилимдан ўтказдим.

— Ҳожимуқон шу бўлади.

Ҳожимуқон илдам юриб келиб худди ёш болани кўтаришга чоғлангандек, энгashiб,

икки букилиб Нуъмонжон билан кўришди. Унинг олдида Нуъмонжон худди дадасига талпинган ёш болага ўхшаб кўринарди.

— Ҳа, Тўппонча, мунча ҳаяллаб қолдинг?

Унинг овози қулоғимга момақалдироққа ўхшаб эшитилди.

— Машина лойга тиқилиб қолган экан, чиқазгунча сал тўхталиб қолдик.

Машина янги очилган ердан эгатга кириб кетди. Ҳожимуқон девқадам билан унинг орқасидан эргашди. Атрофга қарадим. Бу ерлар қаердан сув ичаркин, деб ҳайрон бўлиб Нуъмонжондан сўрадим.

— Фарғона каналидан оламиз. Сув масаласида нолимасак ҳам бўлади. Ариқ қазийдиган янги машина чиққан. Овозини эшиятяпсизми?

Нуъмонжон кунботар томонга қараб қулоқ солди.

— Келаси йили ҳув ўша томондан қирқ гектар ер очамиз. Шунда еrimиз Қўшоқ отанинг ери билан туташади.

Кече отимни суғориб берган чолнинг икки бармоғи қўшалоқлиги, айилишга келганда чол ўша томонга бурилганини эслаб, Қўшоқ ота дегани шу киши бўлса керак, деб гумон қилдим.

Терим машинаси эгатнинг бошига етиб, янги ариқдан қайтди. Брезент палаткадан чиққан ўрта яшар бир хотин сочини бошига турмаб, машина кетида келаётган Ҳожимуқонга қўл силтади. Кейин ўша томонга ғўза оралаб югуриб кетди.

— Ҳожимуқоннинг хотини. Жуда ҳам гапга бичган-да. Қоғияли қилиб гапиради. Аммо

Ҳожимуқон шу гавдасига хотинидан ўлгудек қўрқади.

Ўша палаткадан ёши йигирма бешлардаги сувулвина бир аёл чиқди-да, Нуъмонжонга қаради.

— Чой ичиб олинглар!

Кейин у фартуғини бўйнига илиб, бояги хотиннинг орқасидан югурди.

— Бу киши бизнинг «маликаи дилозор» бўладилар,— деди Нуъмонжон кулиб.

— Сиз ҳам хотинингиздан қўрқасизми?

Нуъмонжон гарданини қашиди.

— Дунёда хотинидан қўрқмайдиган одам ҳам бор эканми.

Палаткага кириб энди бир пиёладан чой ҳўплаган ҳам эдикки, от чоптириб Бургут келиб қолди. Важоҳатидан ҳозиргина бирор билан уришиб келганга ўхшарди.

— Ҳа, Бургут, турқ-тароватинг бошқача, бир гап бўлдими?— деб сўради унга пиёла узатаркан, Нуъмонжон.

— Картинкангдан ўргилдим! Қечадан бери сарсон қиласи-я.— Ўнинг гапига тушунолмай бир-бири мизга қарашиб олдик.

— Сочига тароқ тегмаган, иккита калға шимлик олифта бир машина ашқол-дашқол билан кепти. Картинкага оламан деб, у ёққа қарасам ҳам дурбинини тўғрилайди, бу ёққа қарасам ҳам дурбинини тўғрилайди.

Кечарайком биноси олдида кинохроника-нинг машинасини кўрганимни эсладим.

— Тавба, офтоб чиқаётган томонга қараб, чеккамга пахта қистириб, ўнг қўлимни кўтариб турганимни картишка қиласмиш. Картинка қилсанг артисингни ола келмайсанмий!

Меҳмон, сиз билан Ёғоч полвоннинг ерида учрашамиз.

У чойдан бўшаган пиёлани пилдиратиб бир ирғитиб илиб олди-да, хайр, деб чиқиб кетди. Бир оздан кейин чўлнинг уфқ билан туташган ерида от ўйнатиб кетаётганини аранг кўзим илғаб қолди. Нуъмонжон ҳам бўйнига фартук илиб, машина ололмай қолган пахталарни тера бошлади.

Пайкал бошида ёлғиз қолиб, кўз илғамас пахтазорда жавлон уриб юрган терим машинасини томоша қилиб турдим. Шамол қулоғимга аллақаерда шудгор ағдараётган тракторнинг овозини ўхтин-ўхтин учирив келади. Ариқ қазиётган машинанинг бўри улиганидек ўкиришини бир дам олиб келади-да, яна қаёқларгадир суриб кетади.

От солиб ўтган фотиҳларнинг, қўнғироқ чалиб ўтган карвонларнинг сурони уйғотолмаган асрий мудроқ чўлни янги одам жиловлаган пўлат моторларнинг забардаст турткиси уйғотган эди.

Сотувчи йигит аравада бир бочка керосин олиб келди. Икковлашиб бочкага резинка ичак солиб бакларни тўлдириб олдик.

— Меҳмон, Бургут сизни Ёғоч полвонничиг ерига олиб бор, деб тайинлади.

Аравага чиқаётганимда механик йигит бункерни бўшатиб, ёнилғи олгани пайкал четига чиқаётган эди.

Эгарга қийшиқ ўтириб олган йигит йўл-йўлакай Бургутнинг йигитларини таърифлаб кетди.

— Бургутнинг йигитлари ҳали курашда елкаси ер кўрмаган полвонлар. Ҳозир бу пол-

вонларга Фарғона томонда тарафкаш йўқ. Ёғоч полвон деб ном чиқарган Миразиз ўтган йили паркентлик полвондан йиқилиб қолди. Бургут шундан кейин Ёғоч полвонни бригададан ҳайдаб юборди. Ўша полвонни йиқитиб келмагунингча кўзимга кўринма, деди. Йўқ, бултур куздаги пахта байрамида Фарғонада кураш бўлиб, Ёғоч полвон ўша полвонни чархпалак қилиб ерга урди-ю, юзи ёруғ бўлди.

— Бургут уни бригадага қайтариб олдими?

— Олди. Лекин битта шарт билан олди. Қетмон ишлатмай, пахтани машинада экиб, машинада териш шарти билан. Ҳали боргандага кўрасиз. Ҳар ғўзаларки, бир тупидан бир кўрпалик териб олаверасиз. Ўзи ҳам антиқа одам. Ҳозир айтсам қизиги қолмайди.

Сўнгги марта хириллаб нафас олаётган bemордек шикоятомуз фийқиллаб бораётган арава устида тевараги уфққа туташган чўлни томоша қилиб бораман. Бу уйқуси қочган кўхна паҳлавон чўл билан беллашаётган, худди шу чўлдек бағри кенг, аммо навқирон, ҳар қайсиси алоҳида китобга қаҳрамон бўлса арзийдиган, бири-бирига ўхшамаган табиатли йигитларни кўраётганимга, улар билан ҳамсуҳбат бўлаётганимга ич-ичимдан севинаман.

Бу учрашувларда уларнинг қилиқларини, бўй-бастларидан тортиб, кўз қарашларигача ёдда сақлаб қолмоқ учун тикилиб-тикилиб қарайман.

Чўл ўртасини девордек тўсиб ётган дўнгни ошиб ўтганимиздан кейин йўл гавжум бўлиб қолди. Ҳар қадамда қурилиш материаллари ортган юк машиналари, устига бочка

юклаган бричкалар узун йўлдан кетма-кет ўтиб турарди. Ора-сира мотоцикл патиллаб ўтиб қолади-да, чўл бағрига ўқдек санчилиб бир зумда йўқ бўлиб кетади. Боя Ҳожимуқоннинг ерида эшитилган гуриллаган товуш шу томондан келаётган экан. Экскаватор ҳалқумини чўзиб, қуйқа босиб қолган зовурдан лой чиқазаётиди. Чўлнинг қоқ ўртасида ёнбошига тупроқ пуркиб канавакопатель ариқ қазимоқда. Унинг товуши гўё баҳайбат бир мушук муттасил ойна тимдалаётгандек қийқиллайди. Онда-сонда қуриб қолган ўтларни чимдиб юрган пода учраб қолади. Йўл ёқасида артезан суви шилдираб оқиб ётибди. Ундан тушган шаффоф сув цемент ҳовузчадан тошиб, йўл четида кўлмак ҳосил қилган. Сув атрофига ўсган гиёҳлар ҳали кўм-кўк. Кўлча юзида қўй ва эчкиларнинг қумалоқлари сузиб юрибди.

Колхоз подаси шу ердан сув ичса керак деб ўйладим.

— Чўл қишлоқقا шу томондан туташади,— деди ҳамроҳим, қамчи дастаси билан узоқда сарғимтил тусга кирган дараҳтларни кўрсатиб.

Район марказидан йўлга чиққанимда, чўлга колхоз еридан ўтиб борсак керак, деб ўйлаган эдим. Бу ўйим янгилиш чиқди. Ҳамроҳим эгарга яна қийшиқ ўтириб олди.

— Чўл асли шу томондан сиқиб келиняпти. Боя сиз кўрган Ҳожимуқоннинг ери колхоз очадиган қўриқнинг охирги нуқтаси. Ундан ўёғи бошқа колхознинг зиммасига тушган.

Бирданига чўлнинг ҳавоси ўзгарди, эрта

куз бўлишига қарамай эсиб турган илмилик шабада ўрнига қандайдир димоққа хуш ёқадиган, боғлардан эсаётган ёқимли шамол кела бошлади. Ҳозир биз бир томони ҳали безрайиб ётган чўл, бир томони эса обод бўлган ернинг худудида турадик.

Этаги олисларга чўзилиб кетган чўл тўкӯвчи дастгоҳидаги тандага, янги обод бўлган жойлар эса шу танданинг аста-секин тўқилиб келаётган сергул матасига ухшарди.

Шағал ётқизилган йўлнинг икки четида ҳали усти ёпилмаган бир қаватли бинолар, хом ғишт деворига толь ташлаб устидан тош бостириб қўйилган чала уйлар, баъзан шахмат катагига ўхшаган цемент пойдеворлар учраб туради. Бу ерларда ҳали одам яшамай туриб ёш терак ва қайрағочлар аллақачон ерга парча-парча соя ташлаб улгурган эди.

— Еғоч полвоннинг ерига етиб қолдик.— деди ҳамроҳим, от жиловини ўнг томонга буриб.

Биз йўл олган сўқмоқнинг боши усти шоҳшабба билан ёпилган чайлага бориб қадалар эди. Чайла олдидаги хирмонда Бургут офтобга пахта ёймоқда. Тахминан ўн беш гектар келадиган пахтазорнинг икки томонида икки терим машинаси гуриллаб юриб турибди. То биз чайлага етиб боргунимизча ёнимиздан ўтиб кетган кул ранг «Волга» машинаси устимизга чанг ёпириб чайлага етмай тўхтади. Шамол чангни бир зумда ерга ёнбошлатиб кетди.

Машинадан ўрта ёшлардаги сал қорин ташлаган, қалин қошлари кўзларини тутиб

кетған бир киши тушди. Орқа эшик очилиб мўйловли аёлга ўхшаш бир йигит кўринди. Унинг сочи орқасидан таралиб пешонасига келганда яна тепага қайтариб юборилган эди. Унинг бу қиёфаси менга попишакни эслатди. Оғзида муштук, эгнида почаси тор ва калта чийдухоба шим. У фотоаппарат тасмасини узук тақилган бармоғига ўраб олган эди.

— Мана, ўзингиз айтинг, ўртоқ партком, сира у кишини кўндиrolмаяпмиз,— дер эди у, қора қош партком йигитга.

— Хўш, нима гап?— деди партком, қанорга пахта жойлаётган Бургутнинг яқинига бориб.

— Парво қилманг, Миржалил ака, мендан артист чиқмайди.

— Яхши эмас, атайин Тошкентдан келишибти. Тез бўл, у ёқ-бу ёғингни паратка қил. Қани янга, бояги нарсани беринг!

Чайла орқасидаги бак остига ўт қалаётган Ойниса унинг гапини яхши эшитмади шекилли, ўрнидан туриб савол назари билан қарди.

— Бояги тугун қани?

Ойниса чайла тирговичига илиб қўйилган камзулининг чўнтағидан шоҳи дастрўмолга тугилган нарсани олиб парткомнинг қўлига берди.

Бургут тўнига илашган пахта толаларини кафти билан сидириб бўлгач, дўпписини тиззасига уриб қоқди. Унинг бу ҳаракатларини кузатиб турган баланд бўйли, озғин, қопқора йигит гап қотди.

— Қошингга ўсма қўйиб қўяйми? Янга, упангиздан беринг!

Бу гапдан Бургутнинг энсаси, қотиб, ер остидан ҳўмрайиб қаради.

Партком тугунчадан орден ва медалларни олиб Бургутнинг кўкрагига тақа бошлади. То Бургутнинг «пардози» битгунча калта шимли йигит «Волга»дан кино аппаратини олиб чиқиб уларнинг ёнига келди.

— Шу киши нима деса ғириңг демай ба-жарасан. Хариш отга ўхшаб тайсалламай хап турсангчи!

Бургут билан оператор пахтазорга кириб кетишиди. Оператор йўлда қўшалоқ очилган пахтадан узиб олиб унинг чаккасига тақиб қўйди. Бутун колхоз йигитларига сўз бермай чўлда жавлон уриб юрган бургутсимон бу одам айни замонда оператор қўлида минг оҳангга тушар эди. Гоҳ ўнг қўлини кўтариб терим машинасини бошқараётган механикка нималардир деб қичқирав, гоҳ кун чиқар томонга бургутга ўхшаб талпиниб қўярди.

Охири у «артист»ликдан зерикди шекиллъи, қўл силтаб жаҳл билан пайкалга қайтиб келди. Унинг кетидан эргашиб келаётган оператор норози оҳангда нимадир деди. Бургут яна қўл силтади.

— Икки кундан бери шу кишининг кетида овораман. Яна жиндай қолган эди-я!

— Бургутни бир кунда овлаб бўлмайди. Кетидан икки-уч кун чўл кезиш керак, яхши йигит,— деди бояги тарашадек озғин, новча йигит.

— Шуни айтмайсанми, Ёғоч полвон.

Ёғоч полвонни дарров танидим. Унинг суратини ўтган йили физкультурачилар газетасида кўрган эдим. Республика мусобақасида

паркентлик полвонни йиқитиб Ўзбекистон чемпиони бўлган Асад полвон Иброҳимов шу киши эди.

Партком терим машинасининг механигига «бирпас тўхта» дегандек ишора қилиб, пайкалга чақирди. Бошқаларни ҳам чайла олдига тўплади.

— Кўшоқ отанинг қирқмаси роса бўлиб берибди. Машинага иккита ташлаб қўйган эди, бирга баҳам кўрамиз.

Шофер ҳар бири қўйдек келадиган иккита чўл қовунини инқиллаб кўтариб келди-да, тиззалаб шолчага думалатиб юборди.

Дастурхон устида Ёғоч полвоннинг таърифи бошланди.

— Ёғоч одам! — деди жиддий туриб Бургут. — Лафзли одам у. Ўн саккиз гектар ерни кетмон гегизмай машинада қойил қилиб юборди. Кўряпсиз-ку, икки машиналаб ҳам териб тамом қилиб бўлмаяпти.

Мен ҳам гапга аралашдим.

— Бу киши ҳам хотинларидан қўрқадиларми?

— Бе, — деди Ёғоч полвон қўл силтаб, — гуноҳ қилган йигит хотинидан қўрқади-да! Биз ҳали гуноҳ қилганимизча йўқ. Нима дейсан, Бургут?

Бургут бошини сарак-сарак қилиб кулди.

— Уч-тўрт улфат бир бўлиб гапдан гапчиқиб «ким хотинидан қўрқса ўрнидан турсин» деган таклиф тушибди. Шунда ҳамма ўрнидан турибдию, бир полвон йигит жойидан қўзғолмапти. Ўндан, нега турмадинг, ё хотинингдан қўрқмайсанми, деб сўрашибди. Полвон йигит нима депти денг, хотинимнипг

номини эшитишим биланоқ икки оёғим шол бўлиб ўрнимдан туролмай қолдим, депти.

Қотиб-қотиб кулдик.

— Бизнинг Ёғоч полвон ҳам шунаقا полвонлардан,— деди Бургут унинг биқинига туртиб.— Ҳа дўст! Қоматингга қойилман!

Ёғоч полвон қизариб кетди.

— Ҳеч-да, ичадиган вақтимда, рост гап, жиндаккина қўрқардим. Ўшанда ҳам ҳадеб машмаша қиласвергандан кейин ёлғондакаси қўрқангага ўхшаб турардим.

Қовундан кейин бир пиёладан кўк чой ичиб, ҳамма ўз ишига тарқади.

— Бургут, эртага машинанинг бирини Қўшоқвой отага юбор. Ёғоч полвоннинг пахтаси энди сийраклашиб қолибди. Машина бекор турмасин. Ўн учинчидан кўрак узадиганини юбораман.

Ёғоч полвон ерига бир кўз югуртириб чиқди-да, шундоқ қилсак ҳам бўлар экан, деб парткомнинг сўзига рози бўлди.

Партком ҳам, кинооператор ҳам кетди. Бургут машина орқасидан қараб турди-да, илжайиб қўйди.

— Меҳмон, биз чиққан картинкани Тошкентда кўрадиган бўлдингиз. Биз томонларда ҳам кўрсатар, дейман. Қўшоқвой отани олганда жуда интрасний чиқарди.

Хирмонда шамоллатилган пахталар қанорлангунча шу ерда бўлдим. Қишлоқдан пахта ортиб кетгани машина келди. Ёғоч полвон қанорларни худди ястуқдек енгил кўтариб машинага ирғитар, Бургут эса уларни эпчиллик билан тортиб олиб фишт тахлагандек кузовга жойлар эди. Қанорлар бир-бирига миниб ла-

панглаб қолгунча тахланди. Бургут ерга сакраб тушиб шоферга дарров қайтишни буюрди-да, кўкрагида жаранглаб турган орденларини чиқазиб бояги шоҳи рўмолчага туғиб хотинига узатди.

— Олиб қўй, план тўлган куни тақамиз энди.

— Энди менга жавоб берсангиз, Бургут, шу машинада қишлоққа етиб олай,— дедим унга.

— Ие, бирон кун қолмайсизми? Эртага Ёғоч полвоннинг тўйини қиласиз. Ошини еб кетасиз-да!

— Шу бачканалигинг қолмади, қолмадида.

Ёғоч полвон зарда билан нари кетди.

— Ёғоч пахта пунктидаги лаборант қиз билан нари-бери бўлиб юрар экан. Хотини билib қолиб уйига киритмай қўйган эди. Роза йигирма кундан бери чўлнинг қоқ ўртасида мажнун бўлиб, кўйлак-пўйлагини ҳам ўзи ювиб юрган эди. Ўтган куни қазилик ош қилиб беришни бўйнига қўйиб яраштириб қўйган эдик! Насибангиз қўшилмаган экан.

— Бўлмаган гап, ишонманг бу гапга, меҳмон. Сиртқи техникумда ўқийман-да! Имтиҳонга яқин қолганда лаборант қиз агротехникидан ўзим ўргатиб қўяман деган эди. Манави бемаъни қаёқдаги гапларни хотинимга айтиб уриштириб қўйса бўладими. Аҳмоқ бўлиб яна ўзи яраштириб қўйди.

— Қўе,— деди Бургут менга кўз қисиб қўйиб,— бир балоси бўлмаса шудгорда қуйруқ на қилур. Ҳа, дўст! Писмиқсан, Ёғоч! Писмиқсан!— Бургут шу гапни айтиб тиззасига уриб, қотиб-қотиб кулди.

— Меҳмон, тағин шу гапларни ҳам китобга тиркаб қўйманг.

Улар билан самимий хайрлашиб машинага чиқаётганимда Бургут, папирос чекманг, меҳмон, йўлда пожарний штраф қиласди, деб тайинлади.

Машина ҳавони кесиб, бир текис елиб чўл ўртасида борар, мен эса учрашувлардан олган таассуротларимни қай тартибда қофозга туширишни ўйлаб кетардим.

Машина кечада Қўшоқ ота билан ажрашган жойга келганда қуёш ер этагига ботиб, осмочнинг ярми анор суви сарагандек қип-қизил тусга кирганди. Атрофда тракторлар, экскаваторлар шовқин солади. Уларнинг гулдираганини шамол чўл бўйлаб айлантириб кетади.

Худди тепамда бир чўл бургути баҳайбат қанотини ёзиб гир айланиб учиб юрибди. Шовқинга тўлган чўлда маконини йўқотган бу саҳро султони қўналға тополмай осмонда чарх уриб кезарди. Чўлнинг асрий уйқусини бузган ер бургутлари энди унинг кўҳна масканини эгаллаган эдилар.

Бургут қизғимтил кўкда узоқ айланиб юрди-да, охири бир-икки марта умидсиз қанот силкиб, қуёш ботаётган уфққа қараб сузиб кетди.

Фарғона 1958 йил, декабрь.

ҮРИК ДОМЛА

Мен бу одам ҳақида биринчи марта Ёзёвон чўлининг қоқ ўртасида, Чўл бургутининг чайласида эшигдан эдим.

Чўл бургути янги очилган қўриқдан йигирма беш гектар ерни боғ учун ажратиб қўйганини ва бу ерни обод қилиш учун раисполкомнинг алоҳида қарори билан Ўрик домланинг ўзи келаётганини айтган эди.

Ажаб! Бу Ўрик домлasi ким бўлди? Бургутдан бу одам ҳақида сўрамоқчи бўлиб турган эдим, Ёғоч полвон гап бошлаб қолди.

— Келмайди. Шундоқ боғини ташлаб келармиди. Боғига кирганмисан? Е тавба, бир одамнинг қўлидан шунча иш келишига ақлинг бовар қилмайди.

— Келади! — деди, ишонч билан Бургут. Боғи торлик қилиб қолган, янги кўчатга жой қолмапти. Чўлга кўз тикиб юрган эмиш.

Ёғоч полвон ёйилиб кулди.

— Чол тушмагур ҳам бизга ўхшаб қариганда чўл «жинниси» бўпти-да.

Ўрик домлага қизиқиб қолдим. Бу одам ҳақида унча·мунчани билиб олмоқчи бўлиб,

чайлада икковимиз қолганимизда Бургутдан суриштирудим.

— Ажойиб одам. Ўзи ўлгудек эзма. Тажангликда тенги йўқ, ўрикдан бошқа гапни билмайди. Тўй-пўйга бориб қолса, ашула эши-таётганларнинг энсасини қотириб, ўрикдан гап бошлайди. Асли отини ҳалигача ҳеч ким аниқ билмайди. Аммо Ўрик домла десанг, бўлди. Каттадан-кичик танийди! Жони-дили ўрик. Райондаги колхозларнинг боғида ҳозир шифил мева бериб турган ўриклар шу домланинг кўчатидан бўлади. Одамлар Қавказга дам олгани боришса, Ўрик домла данак йиқ-қани боради. Боғида дунёдаги ўрик навининг ҳаммасидан кўчат бор, дейишади. Областдан кимки чет элга борадиган бўлса, ҳамма ишини йиғишириб қўйиб, уни вокзалгача чамадонини кўтариб кузатиб қўяди. Данак олиб келишни тайинлайди.

Бургут ҳикояси шу ерга келганда тиззасига уриб, қотиб-қотиб кула бошлади.

— Нега куляпсиз, бир гап бўлдими? — дедим унинг bemovrid кулгисидан ажабланиб.

— Бир воқиа эсимга тушиб кетди. Келини билан уришиб қолгани ҳам шу ўрик хусусидан-да! Ўтган йили катта тўй қилиб ўғлини уйлантирган эди. Тўй ҳам жуда антиқа бўлган. Авжи ўрик пишиғи эди. Тўйга келган хотинлар нима бўлса ҳам домланинг кўзини шамғалат қилиб ўригидан бир-иккита узуб ейишни ният қилиб қўйишган экан. Домла, пешонасига замбаракнинг оғзини тўғрилаб турсанг ҳам, ўрикка қўл тегиздирмайдиган хилидан. Тажриба ўрик-да, ахир! Домла нима қилибди денг: қўрғончадан боққа киради-

ган эшик олдига икки обдаста сув, эшик ҳал-қасига учта тўн билан салла илиб қўйибди. Бечора хотин-халаж қариялар таҳорат олгани кириб кетишган экан, деб боққа яқин келиша олмабди. Қалласи ишлаганини қаранг, бу домласи тушмагурнинг! Қойилман. Маладэс!

Бургут яна кула бошлади. Домланинг келини билан ораси бузилганининг сабабини билолмаганим учун яна сўрадим:

— Келини билан нега уришиб қолган эди?

— Ҳа айтганча, ҳали айтдим-ку, домла чет элга ким борса данак олиб кел деб тайинлашини. Саёҳатчилар унинг юзидан ўтолмай ўшоқларда ўрик есалар данагини ташламай олиб келаверишибди. Домла шундай қилиб бир халта данак йиққан эди. Қелин бечора унинг «данак жинниси»лигини билмай, домла йўғида шу бир халта данакни чақиб еб қўйибди. Бошқоронғи экан-да, бечора. Домла қўчадан келса бир ҳовли данак пўчоғи ётган эмиш. Кўрибди-ю, тутқаноғи тутиб қопти. Ҳушига келиб бутун ҳовлини бошига кўтариб дод солибди. Қўни-қўшнилар йиғилибди. Унинг феълини билганлар лом-мим деб оғиз очишолмабди. Келиннинг ранги қум оқариб кетган, дағ-дағ титрар эмиш. Кейин домла ўғлига ўдағайлабди.

— Бу уйда ё мен тураман, ё хотининг турди!

Албатта янги куёв бир нима деёлмай тил чайнаб, анқайиб тураверибди.

Бу гап келиннинг ҳамиятига тегиб, кийим-бошини тугиб отасиникига кетиб қопти.

Бургут яна бошини сарак-сарак қилиб кулди.

Шунақа. Домла ўрик деганда отасини ҳам аямайди.

Кейинги Єзёвон сафаримда Чўл бургутидан Ўрик домлани суриштирдим.

— Қалай, домла чўлга келдиларми?

— Келди,— деди, Бургут кулиб,— юринг, сизни домла билан танишириб қўяй.

Икковлашиб боғ учун ажратилган қўриқ-қа қараб кетдик. Ҳаво булутли бўлса ҳам, чўл устидан илиқ шамол эсарди. Кафтдек текис ерларда қор кўринмас, фақат ҳар ер, ҳар ерда йиғилиб қолган кўлмак сувлар худди осмондек кул ранг тусга кирган, эсаётган шамолда уларнинг бети жимиirlаб, қўроғошиндек ожиз йилтираб қўярди.

Шохлари яланғочланиб қолган бута остидан иккита қирғовул патиллаб кўтарилиди-ю, сал нарироққа бориб тушди.

— Эҳ, қўштиғ бўлмади-да... Роса семизи экан, узоққа учолмади-ку.

Бир оз жим бордик.

— Домла ёнига Тўппонча полвон билан Еғоч полвонни олиб, бир кечадаёқ боғидаги янги ёш кўчатларни ковлаб икки грузовойда чўлга олиб келди. Ҳозир болалар ҳавонинг ғаниматида ола-тасир кўчат ўтқазишяпти. Ҳозир чўлга домланинг ишқи тушиб қолган. Қелганидан бери районга икки марта тушди, холос. Ўзи ҳам боғмисан-боғ бўладиганга ўхшайди.

Дўнг ошганимиздан кейин бундан уч ой аввал кўрганимда канавакопатель ариқ қазиётган жойда қатор ўтқазилган ниҳолларга қўзим тушди. Уч-тўрт одам бир жойга ғуж бўлиб нимадир қилаётган эди. Қадамни тез-

латиб уларнинг олдига бордик. Ёғоч полвон билан Тўппонча полвон ёш ниҳоллар танасига оҳак суртишаётган экан.

— Домла қанилар? — деди Бургут.

— Ҳозир келиб қоладилар,— деб жавоб берди Ёғоч полвон, афтини буришириб, қаддини ростлар экан.

Ёғоч полвонга энди сал-пал жир битиб қопти. Тўппонча полвон эса ҳали ҳам ўшандек чаққон, сер мулозимат. Чиройли кўзлари порлаб турибди.

— Бу чинқарча кўчатларни оҳаклайман деб белим қотиб кетди. Манави пакар энгашмай тик туриб оқласа, мен икки букилиб оқлаяпман!

Дарҳақиқат, бу узун бўйли йигитга ҳадеб энгашавериш осон тушмас эди. Тўппонча полвон пичинг қилди.

— Ҳозир менга маза-ю сенга азоб, ўрик пишганда сенга маза-ю, менга қийин бўлади. Негаки сен тикка туриб узверасан, мен бўлсам тегимга тўнка қўйиб чўзиламан.

— Сенга бу домла ҳали-бери ўрик уздириб қўя қолмасов, нима дейсан, Бургут?

Бургут унинг бу гапига кулиб қўя қолди. Чўққи соқол, бошига пати тўзиб кетган сурма ранг дўппи кийган, кўзойнакли олтмиш ёш лардаги чол велосипед миниб келиб қолди. У, у ёқ-бу ёққа қарамай, салом-аликни ҳам унутиб Бургутга бир қофоз узатди.

— Телеграммага жавоб. Шредер станциясидан уч юз туп кўчат оладиган бўлдик. Раисга айтсангиз: иккита грузовой берса, эртага Тошкентга кетаман. Мирзачўлдаги тажриба станциясидаги агроном Эшонхонов билан

бирга ўстирган кўчатларимиз бор. Қайтишда ола келаман. Қалай, маъқулми?

Чол гапини тугатиб бўлгандан кейингина биз билан кўришди. Кўришди-ю яна ўз гапи билан овора бўлиб кетди.

— Ҳаво роса бўлиб берди. Кўчат ҳозир маст уйқуда. Кўчатни уйқусида босган ютади. Эрталаб Риштондан элликта кўчат келади. Ағар Тошкентга кетиб қолсам, Бургут болам, ўзингиз бош бўлиб анави радга эктирасиз-да!

Ўрик домла ёнгинасида турган кўчатнинг узун бир новдасини эгиб, гул қайчи билан кесаётганда, Бургут қулоғимга шивирлади:

— Бўлди энди, ўрикдан бошқа гап йўқ. Сув ичмай икки соат гапиради.

Дарҳақиқат, Ўрик домла ўрикдан гапириб кунни кеч қилса-я! Қантак ўрикнинг ватани асли Риштон бўлиб, Конибодомга кейинчалик бориб қолгани, оқ ўрикнинг Риштондан кўра, Андижонда яхши ҳосил бериши, «пошшойи»-нинг туршагидан қилинган шарбатни баҳорда ичилса, меъдани тозалаши, хашаки ўрикнинг қоқисини молга қайнатиб ичирилса қўтирир бўлмаслиги, «Кал йўлдош»дан • солинган баргакни олтин гугуртнинг тутунига димласа, худди тиллага ўхшаб сап-сариқ бўлишини роса тушунтириб кетди.

Унинг гаплари мени асло зериктирmas эди. Ўз ҳунарига бутун умрини бағишлигаран бу қария етук бир олим бўлиб туюларди. Ахир, у олтмиш йиллик умрида хасислик билан кўкартирган қанчадан-қанча кўчатлари бутун бир водийнинг саноқсиз боғларида яшнаб турганини ўйлаганим сари унга ҳавасим ке-

лар, юрагимда чуқур ҳурмат туйғулари қўз-
фаларди.

Кеч кириб атрофни қоронғи босди. Узоқ-
да, янги посёлкада чироқлар милтиради. Тўр-
товлон орқага қайтдик.

— Домла,— деди Бургут йўлнинг ярмига
етганимизда,— Тошкентта кетмасингиздан ав-
вал қудангизникига бориб, келинни кўриб
кетсангиз бўларди.

Чол нимадир деб тўнғиллади. Чўл шамоли
унинг овозини орқа томонга олиб кетди. Яна
озроқ йўл юрдик.

— Бир халта данак-а, Ҳиндистондан,
Аффону Арабистондан, Қашқару Кашмирдан
келган данаклар эди-я. Э, аттанг!

— Бўлар иш бўлди, домла, энди ярашиб
қўя қолинг. Кечиринг уни, билмасдан қил-
ган-да.

— Сира кечирмайман. Бир халта данак
энг камиди икки юз туп кўчат бўлар эди.
Қанақалигини ҳам билолмай қолдим.

Чол энди бошқа гапирмади. То қишлоққа
етиб келгунимизча ундан садо чиқмади. Ке-
лини еб қўйган данаги юрагини яна эзиб
юборди шёкилли, «степторг»нинг автолавкаси
олдида биз билан хайрлашар экан, бўшашиб
қўл узатди. Дўкондан тушиб турган чироқ
шуъласида унинг юzlари худди фижимланиб,
ўзи бирдан қариб қолгандек кўринди.

— Кўрдингизми ўжарлигини,— деди Бур-
гут, уйга кирганимизда.— Данак воқиаси жу-
да ёмон таъсир қилган, қачон эзмалик қилиб
гапни-гапга қоруштирмаса атайнин данакдан
гап очиб қўяман. Дами ичига тушиб кетади.

Ҳозир дунёда битта душмани шу келини, кўрарга кўзи йўқ.

Биз Бургут икковимиз алла-паллагача ухламай, чўл ҳақида, чўлни ўзлаштираётганлар ҳақида гаплашиб ётдик. Боя домла ўрик ҳақида қандай тўлиб-тошиб гапирган бўлса, Бургут ҳам қулфи дили очилиб, чўл ҳақида худди шундай мириқиб гапира кетди. У шундай яйраб гапирар эди-ки, етук бир шоир ҳам чўлни учкалик таърифлай олмас эди.

— Биласизми, меҳмон, ёз кечалари уйдан дайдиб чиқиб кетаман. Осмон тўла юлдуз, ой чўл устига келганда пастлаб ўтади, ё менга шунаقا туюладими, ё ростдан ҳам ўзи шунақами — билмадим. Тунда турна учганини кўрганмисиз? Мен жуда кўп кўрганман. Жуда гашти бошқача бўлади. Худди қўй ҳайдаган подачига ўхшаб «қуре-қуре» деб осмони заминдан ўтаверади. Айниқса ойдин кечасидагининг гашти бошқача бўлади. Синкага солинган оқ дока орқасидан учиб ўтаётганга ўхшайди. Шамол қишлоқ томондан ғалати ислар олиб келади. Қўйингчи, чўлда ёз кечаси чалқанча ётиб ухламаган одам, бу гапларнинг маъни сига етмайди.

Бургут яхши бир қўшиқ эшитаётгандек тез-тез кўзини юмиб паст овоз билан гапирарди.

— Хай, майли ухлайлик энди, меҳмон.

Бургут эндигина кўрпага бурканган ҳам ғэдики, кўча томондаги деразани бирор чертди.

— Бургут болам, мен! Тўппончага айт, отни берсин. Қишлоққа тушиб чиқаман.

Бургут шошиб кийиниб чиқиб кетди. Үн-

ўн беш минутлардан кейин қайтиб келди.
У уйқули кўзларини ишқаб, ҳадеб кулар эди.

— Ўрик домланинг келини ўғил кўрипти.
Оғзининг таноби қочган. Бир жойда туролмайди. «Ҳиринг-ҳиринг» кулади. От олиб бердим, қишлоққа кетди. Боя келинини кўргани кўзи йўқ эди, ҳа, фарзанд экан-да! Туғруқхонадан чиқиши билан чўлга кўчириб келаман, дейди. Ҳали кўрарсиз, невара тўйи қилиб беради. Пул кўп бу чолда. Тошкентда ўрик хусусида мана бундоқ катта китоби чиқкан. Ҳа, айтганча, кинони кўрдингизми? Қизталоқ киночилар худди ўзимни опти-қўйипти-я. Қурултойда қўйиб беришди. Мирзачўлдаги Фанишерни ҳам олишган экан. Делегатлар икковимизга ҳам «эрийсанлар» деб туриб олишди. Меҳмонхонада зиёфат қилиб бердик. Фанишер билан уриштириб ичдим. Икковимиз ўша ерда қўл олишдик. Нима дэйсиз, меҳмон? Фанишер зўр-а?

— Сиз ҳам чакки эмассиз,— дедим.—
Ахир, сизни кимсан Чўл бургуги дейишади-я!

— Мен Чўл бургуги бўлсам, Фанишер Мирзачўлнинг шери.

— Шер билан бургутнинг ташлашгани қизиқ бўлади.

Бургут кула-кула чироқни ўчириб кўрпага кирди. Уйқум қочди. Қўзимга чўл ўртасида отини елдириб кетаётган Ўрик домла кўриниб кетди. Назаримда у булутлар орасида гоҳ ёниб, гоҳ ўчиб турган юлдузларга, отининг ёлинни сийпаб ўйнаётган чўл шамолларига ҳам ўрик ҳақида гапириб бораётгандек, атрофида ястаниб ётган текис чўлга ўрик кўчатларини бир текис тикиб кетаётгандек, янги

туғилган неварасига саватда ўрик олиб бора-
ётгандек эди.

Чўлларда бошланган янги ҳаёт ва янги
одамларнинг қиссасини ёзиб тугатиб бўлар-
миди!

Бу қиссанинг ҳам ҳали давоми бор.

1959 йил.



ЛОЧИН

Эрталаб Ўрик домла райондан қайтиб келди. Унинг оғзи қулоғида, қиқир-қиқир кулади.

— Неваралар муборак бўлсин, домла,— деди Бургут унга чой узатар экан.

— Қуллуқ, қуллуқ, болам, омон-эсон қутулибди, ишқилиб.

Домла чой устида қизиқ бир ҳангомани айтиб берди.

— Туғруқхонага кетаётсам райторг Умаралининг уйида қарс бадабанг, ўйин-кулги. Қизини чиқазаётган экан. Эшигининг тагига машина тиқилиб кетган. Ичкарига қисташди, узримни айтдим. Қайтишда киришга ваъда бериб ўтиб кетдим. Кўнглим хотиржам бўлиб қайтиб келсан тўйхонада ола-тасир тўполон. Ўмарали фирт маст, оғзидан боди кириб, шоди чиқиб хотинини сўкади, ёр-ёр айтиётган яллачининг қўлидан чирмандасини олиб кўзимнинг олдида жаҳл билан кетмон дастаси-
га уриб қолса бўладими, чирмандани дастага тешик кулча қилиб кийгизиб қўйди. Нима гаплигини ҳеч ким билмайди, ҳамма ҳайрон.

Куёв Умаралининг этагидан ушлаб олган.

Худди янги туғилған бузоққа ўхшаб оёғида аранг туради. Юрса гандираклаб кўрга ўхшаб одамларни пайпаслайди, оз бўлмаса ер ўчоққа тушиб кетай деди. Хайрият ошпаз этағидан тортиб қолди.

Шивир-шивир гап бўлиб қолди. Нима дейсан, келин хуштори билан қочиб кетибди.

Ичкари ҳовлидан хотин кишининг чапак чалиб йиғлагани, эркак кишининг сўkkани эшитилди. Тўй тарқади. Күёвнинг отаси берган қалинини қистаб қолди. Умарали сатта ўзини мастиликка солиб гапни чалғитади.

— Топаман, ернинг қаърига кириб кетган бўлса ҳам тортиб чиқаман. Осмонга учиб кетган бўлса бор мулкимни —«Победам»ни ҳам, хотинимнинг бўйнидаги ўн тўрт қават дурни ҳам, ҳовли-жойни ҳам сотаман. Спутник сотиб олиб орқасидан қувиб чиқаман.

Умарали шу гапларни айтди-ю, сабзи тўғраб қўйилган бўйранинг устига йиқилиб, учиб қолди. Күёв боя қайнатаси чирмандини тешиб қўйган яллачининг пешонасини силаб, толеи йўқлигидан, аввалги хотини ҳам бевафолик қилиб бошқа бирорга тегиб кетганидан нолиб, йиғи бошлади. Яллачи шилқимлик қилаётган «бетоле» куёвни силтаб ташлаб чиқиб кетди.

Хижолатликда томоғимдан бир қултум ҳам чой ўтмади. Чиқиб кетдим.

Үрик домла ҳикоясини тугатиб, совуб қолган чойни шимирди.

Мен унинг гапларига қулоқ солиб ўтириб, «ҳаҳ ўрик аралашмаган гапинг ҳам бор эканку!» деб дилимдан ўтказдим.

— Хай майли, болам, энди менга жавоб.

Ҳаво яшнаб кетди, қўчатлардан хабар олиб қўяй.

Чол хайрлашиб чиқиб кетди. Бургут кўчагача уни кузатиб, қайтишда олтмиш ёшлардаги кампирни бошлаб кирди.

— Хизмат, ая, бобой яхши юрибдиларми? 1

— Шукур, шукур, болам.

— Фанивой қалай, кўринмай қолди-ку!

Кампир Бургутнинг сўроғига жавоб бермай кўзини ерга қаратди.

— Нима бўлди?

Кампир бесаранжом бўлиб қолди.

— Йўқ, ҳеч гап бўлгани йўқ.

— Айтаверинг.

— Ўзингизга айтадиган гапим бор.

Буларнинг гапига ҳалақит бераётганимни сезиб қолдим. Кампир ҳушёрлик қилиб Бургутни ҳовлига имлади. Унинг кетидан чиқиб кетган Бургут анча ҳаяллаб қолди, сал фурсатдан кейин ҳовлидан унинг ўтин ёргандек қарсиллаб кулгани эшитилди.

Бургут уйга қайтиб кирар экан ўзидан-ўзи кулар, ҳадеб «маладэс, маладэс» деяр эди.

— Қани юринг, меҳмон, бир жойга бориб келамиз.

— Бир гап бўлдими, тинчликми?— дедим ҳайрон бўлиб.

— Бир гап эмас, минг гап деяверинг, юринг, йўлда айтиб бераман.

Ташқарига чиқдик, ёлғиз оёқ йўлдан чўлни кесиб Қўшоқ ота звеносига қараб пиёда жўнадик. Олисада, шу йўлнинг уфққа сингиб кетган жойидан бояги кампир ҳассасига таяниб жадал борар эди.

— Хўш, десангиз, мен сизга айтсам, боя
Урик домла айтган тўйдан келинни ҳалиги
кампирнинг ўғли олиб қочган экан. Ярим ке-
часи «Победа»да олиб келибди. Кампирнинг
ўтакаси ёрилиб тонг отгунча мижжа қоқмай
ана шарманда бўламан, мана шарманда бў-
ламан, деб юрагини ҳовучлаб чиқибди. Қиз-
нинг отаси Умарали закончи, кўп одамга зул-
мини ўтказган ярамас нарса. Бечора кампир,
Ғанивойга насиҳат қил, қизни элтиб қўйсин
деб келибди.

— Қиз билан Ғанивой аввалдан дон оли-
шиб юришармиди? — дедим, қизиқиб.

— Дон олишганда қандоқки, иккови ўнин-
чини бирга битирган, битиргандан кейин
Фарғонага бориб тракторчилар курсида ҳам
бирга ўқиб келишган. Ўзи жуда сулув қиз.
Шаддодликда тенги йўқ. Эсимда бор, ёш
вақтида ўғил болалар билан кураш тушаве-
рарди. Қап-катта болаларни уриб йиғлатарди.
Зўр нарса ўзи. Бир йилча бўлди отаси ишга
чиқазмай қўйган. Бўлмаса МТС да бинойидек
ЧТЗ ҳайдаб юрган эди, медаль ҳам олган.
Ишга чиқмаганига Райком комсомол ҳам
аралашди, нима бўлди-ю, иш босди-босди бў-
либ қолаверди. Умарали закончи йўлинни қил-
ган-да. Худо урган ярамас одам дедим-ку
сизга, боя. Яқинда шивир-шивир гап бўлиб
қолди. Умарали қизини истансадаги доррес-
тораннинг буфетчисига бераётганмиш деб
эшитдик. Аламига чидолмаган Ғанивой маст
бўлиб буфетчининг бошига бутилка билан
уриб, ўн икки кун мелисада ҳам ётиб чиқди.
Қизни астойдил яхши кўрар эди-да. Бу ҳам
ўзи боевой бола. Орияти кучли. Игнани туш-

га ботириб, билагига санчиб, юракнинг суратини уч бурчак қилиб ишлатибди, бир ёғига Ойша, бир ёғига Фани деб ёзиб қўйибди,вой тентаг-ей. Шу қилифига комсомол мажлисида роса ўсал қилишган.

Гап билан бўлиб Қўшоқ отанинг қўрғонига етиб қолганимизни билмай қолибмиз. Қўшоқ ота тутнинг тагида чўққайиб бўкиб қолган сигирга туз ялатаётган экан, бизни кўриб ўрнидан турди.

— Қелдингми, болам, э меҳмон, зерикиб қолмадингизми?

Чолнинг бу гапидан, сен нима қилиб юрибсан, сени чақиртирганим йўқ эди-ку, деган маънони англаб жуда мулзам бўлдим.

— Фанивойнинг ўзи қани?— деди Бургут чолга.

— Уйда, иккови ҳам уйда. Бўйнинг узилмагурларнинг қилган ишини қара. Энди нима қиласмиш.

— Ҳайронман,— деди Бургут елкасини қисиб.

— Ичкарига киринглар, яхшилаб насиҳат қилинглар, маломатга қолмайлик.

Ҳовлига кирдик. Жуда ҳам чиройли, йигирма тўрт ёшлардаги, қомати худди қўйиб қўйгандек бир қиз, ариқ бўйида жомашовда гупиллатиб кир ювялти. Ҳавонинг салқин бўлишига қарамай, майка кийган шоп мўйлов йигит беҳи шохига кир ёйиш учун арқон боғляялти. Қиз бизни кўриб тиззасига йифилиб қолган этагини тушириб ўрнидан турди.

— Ие, келинглар,— деди, шоп мўйлов йигит арқонни ташлаб кўришгани қўл узатар экан.

— Ҳа, Ғанивой,— деди, Бургут қизга имлаб,— елмай-югурмай куёв бўлиб олибсанми?

— Нега елмай-югурмай бўлар экан, кеча тўйимиз бўлган, фақат тўй харажатини буфетчидан насия қилдик-да,— деди кулиб,— қани ичкарига киринглар, Ойшахон, чой қўйиб юборинг, дарров.

Ойшахон айвон лабида турган оқ самоварни кўтариб ошхона томонга ўтиб кетди. Кампир кирди.

— Ўзинглар тушунтиринглар, гапиравериб жағимда жағ қолмади.

Қўшоқ ота гапга аралашмади, хонтахтанинг четида болиши бағрига тортиб нималарнидир ўйлаб тек ўтиради. Кампир ўзларинг бир нима денглар, дегандек бизга қарайди. Ҳамма жим. Бу жимликни Қўшоқ ота бузди.

— Жуда хунук иш бўлди-да. Онаси зор қақшаб қидириб юргандир. Отаси бўлса...

Чолнинг гапи оғзида қолди, Бургут «Отаси чорт сним» деб русчалаб юборди.

— Фарзанд-да, ахир. Бўладиган бўлса очиқ-оидин қилиш керак эди, эртага элнинг оғзига тушади, унда нима деган одам бўламиз, ҳалқ нима дейди?

— Ҳалқми,— деди Бургут,— ҳалқ маладэс, дейди.

Боятдан бери судга тушган гуноҳкордек ҳамманинг кўзига қараб ўтирған Ғанивойга бирдан жон киргандек бўлди.

— Э, дийдорингдан айланай, Бургутим, гапир, гапир шунаقا.

Кампир топиб келган насиҳатгўйидан куйганини билиб қолди.

— Энди таپ шу,— деди Бургут, чўрт кесиб,— Фанивой жуда бопта иш қипти, бунақа ишни йигитнинг хўрози қиласди. Қиз рози, йигит рози, вассалом. Қим нима деса деяверсин. Маладэс! Қизни зўрлаб сотадиган замон ўтиб кетган.— Бургут ҳовли томонга қараб қичқирди.— Ҳўй, Ойшахон, синглим, бир бақча қараб қетинг!

Ойшахон деразадан қаради.

— Шу иш сизнинг розилигингиз билан бўлганми, тўғрисини айтаверинг.

— Агар ўзим рози бўлмасам, тракторга сургатиб ҳам опкелолмасдилар.

— Шу гапдан қайтмайсиз, а? Бўпти, битта универсаль сизники, потилларатаверасиз. Қайси звенога қўяйлик.

— Эрим қайсинда бўлса мени ҳам шунга...

— Вой шўрим,— деди кампир юзини тирнаб,— на никоҳ, на закска қоғози, эрим дейди-я... Вой мусулмонлар, ҳеч бўлмаса Ўрик домлани чақириб никоҳлаб қўйинглар.

— Кўп вайсама,— деди чол зарда билан,— Ўрик домла сен айтган диний домлалардан эмас, илм домласи, янгича китоб ўқийдиган домла! Розиман, раҳмат сизга, қизим, бир боламни шунча иззат қилиб осмон никоҳини бузиб кепсиз, юрагингизга балли. Энди мундоқ қилсанглар, эртага район тушиб дадангиз билан энангизга юз кўрсатиб келсангиз. Ҳарна қилса ҳам фарзандлик қарзи. Майли Фани ҳам борсин.

— Бормайман!— деди Ойша қатъий қилиб.

— Жон болам, айланай болам, энангизга раҳмингиз келсин.

Маслаҳат билан Ойша уйга бориб кела-диган бўлди, фақат уч кундан кейин, эри билан бирга бормоқчи бўлди.

Бургут қизиқчиликка уларни «никоҳлаб» қўйди.

— Биби Ойша, ибни Умарали қизи, Ёзёвон РТС механиги, комсомолнинг етти йиллик аъзоси орденли Фани Қўшоқ ўғлини никоҳнингизга қабул қилдингизми?

— Пажалста қабул қилдим,— деди Ойша учун атайин хотинча ингичка овоз билан Фанивой.

Ойшанинг ўзи ҳам пиқиллаб кулиб юборди.

Эртасига чиллали келин Бургутнинг участкасига шудгор кўтаргани универсаль миниб келди. У қулоғига бир даста гунафша қистириб олган, атайин келинлигини билдириш учун юзига билинар-билинмас қилиб упа қўйиб, кўкрагига пастга қаратиб чучмўма тақиб олган эди. Ундан гуп-гуп атир ҳиди анқир эди.

Бургут унга ҳайдаладиган ерни кўрсатиб берди. Ойша моторни ўт олдириб рулга ўтироқчи бўлиб турган эди, узоқдан мош ранг «Победа» кўринди. Ойша бир нима сезгандек қўл силтаб тракторни ҳайдаб кетди. Қиши билан қор сувини шимиб кўпчиган ер палахса-палахса бўлиб кўча бошлади. «Победа»— келди. Ундан ширакайф «куёв» тушди. У ёқбу ёққа қарамай трактор кетидан югурди. Ойша атайни уни кўрмаганга солиб руль бошқариб кетаверди.

— Тўхта, ўттиз икки минг сарф қилганман, судга бераман.

Ойша қўл силтади. Куёв елдек югуриб трактордан ўтиб кетди-да йигирма метрча нарига бориб йўлга узала тушиб ётиб олди.

— Улигимнинг устидан ўтасан.

Трактор унга тўрт метрча қолганда тўхтади.

— Тур-э, бетинг қурсин. Ҳозир босиб қурвақадек эзиб кетаман...

— Ўзимни осаман, жавобгар бўласан.

Ойша трактор орқасидаги бир ўрам арқони олиб унга улоқтирди.

— Ўзингни оссанг, ҳув ана, сим тортилмаган столба бор.

Ойша зарда билан яна рулга ўтирди. Унинг ҳаракатларини кузатиб турган Бургут:— маладэс!— деди.

Ойша юриб кетаётган трактор устида тик туриб орқага қаради. Унинг бу қарashi негадир менга лочинни эслатди. Буни Ўрик домла ҳам пайқаб турган экан.

— Ҳа умрингдан барака топ, лочиннинг ўзисан-а!— деб юборди.

Мен чўлда рўй берәётган бу ҳодисаларни, чўл бағрига қўл солиб унинг яширган бойликларини тортиб олаётган бу танти — мард одамларни кўриб юрагимдан уларга таҳсин ўқидим.

Чўл бургути ёнига йигитларини олиб Ўрик домла обод қилган янги боғни айланиб каналдан лой чиқазаётган экскаваторчилар олдига от чоптириб кетди. Чўлнинг уфқ билан туташган ерида уларнинг сояси кўринди. Олдинда Бургут елиб боради, ортидаги йигитлар гоҳ олдинга ўтиб, гоҳ кейинда қоларди.

Уларнинг бу кўриниши худди Бургут болаларини парвозга ўргатаётганга ўхшарди.

Ўрик домла билан икковимиз қолдик. У яна ўрикдан гап бошлармикан деб қўрқиб турган эдим, йўқ, иши қистов экан, боғига кетди.

Ёлғиз қолдим. Ойшанинг трактор ҳайдашини кузатиб туриб хаёлга толдим. Бургутнинг йигитлари парвоз қилган чўлга яна бир лочин учиб келгандек бўлди. Бу шундай лочинки, на унинг қанотини қирқиб бўлади, на қафасга солиб бўлади. У қафасни парчалаб кенгликларга парвоз қилган шаддод чўл лочини эди.

1959 йил.

МУҲАББАТНИНГ ТҮФИЛИШИ

Кеча жуда ойдин эди. Азамат теракларнинг япроқлари кумуш астарларини ойга тутиб ором уйқусига кетишган. Фақат ариқлардаги тинмагур сувларгина қўнғироқ чалиб сапчишади, қирғоқлардаги гиёҳларнинг баргларини тортқилаб уларни узоқларга олиб кетмоқчи бўлишади. Уяларида мудраган қушлар эса уйқусираб патирлаб қўйишади:

Шу ором ва фароғатга тўла саратон тунида боғ кўчадан бир қиз билан бир йигит келади. Уларнинг соялари олдинга чўзилган, худди шу сояни босиб олмоқчи бўладилар-у, етолмайдилар. Баъзан уларнинг бу узун соялари дарахт сояларига қўшилиб кетади-да, яна пайдо бўлади.

Улар анҳор кўприги устида тўхташди. Икковининг сояси кўпrik устидан кўндаланг тушиб ётиб олди.

— Қачон кетасан?— бу қизнинг овози эди.

— Ҳозир кетаман!— деди йигит бир қадам орқага тисарилиб. Үнинг сояси кўпrikдан ошиб сув бетига тушди. Ойнинг сув жимиридаги чақини ўчди.

— Йўқ, Мирзачўлга қачон кетасан, деяпман.

— Бирон ҳафтадан кейин кетсам керак,— деди йигит, бепарволик билан. Энди у яна олдинга чўзилди. Сув жилвасида яна ойнинг кумуш тангаси чақнади.— Узи уйинг қаёқда? Етай деб қолдикми?

Қиз орқасини ўгириб олди.

— Үн йил бирга ўқиб ҳалигача уйимни кўрмагансан-а, қўй-э.— Унинг овозида қандайдир ўпками, таънами, нимадир бор эди.

Улар бир неча минут сўzsиз туриб қолиши. Қиз кўприк панжарасига бағрини бериб, сув оқиб кетаётган томонга қараб турарди. Сув шалоплаб соҳилга урилади, орқага қайтмоқчи бўлади, аммо оқим кучи уни қуиға, туннинг сирру-сеҳрига тўлган қўйнига олиб кетади.

— Совуқ қотдим,— дели қиз титраган товуш билан.

— Уйингга кета қол бўлмаса,— деди йигит унга раҳми келиб:

Қиз кескин бурилиб йигитга қаради. Қаради-ю, унинг кўзига тикилиб индамай қолди. У вужудида, қалбида нималар бўлаётганини билмасди. Унинг гоҳ йиғлагуси, гоҳ кулгиси, гоҳ бутун кечани остин-устун қилиб қўшиқ айтгуси кёларди.

— Кетаман, хайр,— деди йигит унга қўлини узатиб, унинг ҳам қўли титрарди. Йигит бир неча қадам нари кетди. Тўхтади. Орқасига ўгирилди, нимадир демоқчи бўлди. Деёлмади. У ҳам шарақлаб оқаётган анҳорга қаради. Шамол эсади. Терак барглари шитирлади. Аллақайда бузоқ уйқисираб маъради.

Кимдир, жуда олисда қўшиқ айтди. Яна тинди. Йигит қайтиб келди-да, қизнинг билагидан ушлаб қаттиқ сиқди. Унинг соchlарини қўллариға ўраб энтикли. Кейин тез бурилиб узун соясини орқасига эргаштириб кечада қўйнига кириб йўқ бўлди.

Қиз у билан хайрлашганини, билагини ушлаганини, соchlарини қўллариға ўраганини сезмади. Фақат олисдан тош йўлда кўндаланг тушиб, бир кўриниб йўқ бўлган соясинигина эслаб қолди, холос. Қиз ҳам ўз соясини олдинга ташлаб тош ётқизилган кўчада астаста юриб кетди.

Бу қиз худди шу бугун ўнинчини битириб, балофат гувоҳномасини олди. Мактаб ҳовлисида ҳали ҳам чироқлар ёниб турибди. Хайрлашув зиёфатига келган ҳамсинвлар ҳали тарқалишганча йўқ. Ҳовлини тўлдириб танца тушишяпти, қўшиқ айтишяпти. Тонг отиши билан улар ҳар томонга тарқаб кетишади. Улардан фақат бирга олдирилган суратгина ёдгор қолди, холос!

Шундаймикин?

Дўстлик-чи, ўн йиллик хотиralар-чи, бирга кечирган аччиқ чучук кунлар-чи, ҳар куни неча бор дарсга чақирган қўнғироқ товушичи, отадек меҳрибон ўқитувчилар-чи... Ҳаммаси энг ширин хотира бўлиб ёдда қолади. Мана шу азиз, нурга, оҳангга тўлган беғубор хотиralар орасидан бўй чўзиб, қад кўтариб, ҳаммадан олдинда, ҳаммадан баланд бўлиб Омоннинг қиёфаси кўринади. Нега?

Бу саволга қиз жавоб тополмасди. Жавоб

ҳам излаб кўрмасди. Шу ойдин кечада ҳамма нарса унинг хотиридан кўтарилидди-ю, биргина Омоннинг юзи, кўзи, гавдаси, бутун борлиги билан пайдо бўлди.

У тош йўлдан битта битта босиб шу йигит ҳақида ўйлаб борарди.

Омон синфдошлар ичида энг шўх, энг уришқоқ бола эди. У қизлар билан чиқишолмас, уларга кун бермас эди. Ёнига бирон қиз ўтириб қолса зарда билан бошқа партага ўтиб кетарди. Пардоз қилган қизларни жуда ёмон кўрарди. Бир кун Санобар деган қиз юзига упа суриб келганда унинг қўлинин қайириб, дастрўмоли билан юзидағи упани артиб ташлаган эди. Қизлар ҳам уни хушламас, минг хил лақаб қўйиб чақиришарди.

Имтиҳоннинг дастлабки кунлари эди. Омон синфда ҳеч ким йўқлигини билиб эшикни зичлаб бекитди-да, ғайри табиий бир товуш билан деди:

— Азиза, ўнинчини битирганимиздан кейин менга тегасанми?

Шунда Азиза жаҳл устида унинг юзига бир шапалоқ урди-да, йиғлаб чиқиб кетди. Бу сирни уларнинг икковидан бўлак ҳеч ким билмай қолди. Омон шундан кейин қизга рўбарў келишдан қўрқиб ўзини четга олиб юрди.

Кунлар ўтиши билан Азиза ўша воқиани тез-тез эслайдиган ва ҳар эслаганида юрагининг аллақаери жиз этиб кетадиган бўлиб қолди. Ҳар гал мактаб ҳовлисига кириши билан кимнидир, ниманидир жонсарак бўлиб қидиради. Унинг шўх, қувноқ кулгилари камроқ эшитиладиган бўлиб қолди. Ҳамиша

чақнаб турадиган кўзларида билиб бўлмайдиган ички бир дарднинг ифодаси сезилиб турарди. Омон ҳам уни зимдан кузатар, кўзи-кўзига тушганда бирдан тунд бўлиб қоларди.

Имтиҳонлар тугаб бирор ишга, бирор ўқишига кетадиган бўлди. Азиза қўйиб берса ихтиёрини Омоннинг қўлига топширишга тайёр эди. Бугунги хайрлашув кечасида Омон Мирзачўлга, МТСга кетишини айтди. Ҳамма унинг бу қарорини чапак чалиб қарши олганда Азиза бир сесканиб кетган эди. Танца бошланди. Азиза Омонни четга чақириб ундан уйига кузатиб қўйишни сўради. Омон унга жавоб бериш ўрнига:

— Бай-бай-бай. Мунча атирга беланмасанг. Роса гупиллаб кетяпти-ку,— деди.

Азизанинг «О тентак, ҳаммаси сен учун» деб юборишига оз қолди. «Кел, кузатиб қўя қол» деб ёлворди унга.

Шовқин тўла мактаб ҳовлисини ортда қолдириб улар икковлашиб боғ кўча томонга йўл олишди. Ой нури боғу роғларга оппоқ нур сочиб турган шу сокин саратон тунида уларнинг иккови жимгина келишаркан на унисидан, на бунисидан садо чиқарди. Бу жимликни Омон бузди.

— Ўша бемаъни гапимни эсингдан чиқаз, Азиза.— У шундай деди-ю бу камгап, лекин ниҳоятда ажиг бир ҳиссу ҳаяжонга тўлган қиз олдида ўзини кўрсатиш учун азим теракними, анҳор бўйидаги шохлари тарвақайлаб кетган толними илдизи билан кўтариб осмонга отгуси келди.

Қиз ҳам унинг бу ҳолатини сезиб турарди.

— Қанақа бемаъни гап, эсимда йўқ,— деди қиз ўша «бемаъни» гапни яна эшитгиси келиб.

Омон тил чайнади.

— Ҳу, синфда икковимиз ёлғиз қолганда бир гап айтган эдим-ку.

— Ҳа,— деди Азиза чўзиб.— Ўша гапни борди-ю эсимдан чиқазмасам-чи?

Омон юришдан тўхтади.

— Унақа бўлса бу юзимга ҳам яна ур, шундай қилсанг яхши бўлади, сени кузатмай қайтиб кета қоламан.

Азиза нима дейишини билмай гангиб қолди.

— У вақтда ёш бола эдик.

— Нега ёш бола бўларканмиз. Ўн беш кун бўлди, холос. Дарров катта бўлиб қопмизда,— Омон шу гапни айтди-ю, шарақлаб кулиб юборди. Тол бутогида мудрагаң мусича чўчиб кетди.

— Бўлмасам-чи, мана,— деди Азиза, шу бугун, бундан ярим соатча олдин қўлига теккан етуклиқ аттестатини баланд кўтарди, балоғат гувоҳномасининг зар ёзувлари ой нурида ялтираб кетди.— Мана, катта одам бўлиб қолганимизнинг гувоҳи. Энди мени ёлғиз ташлаб уйингга кетиб қолмайсанми?

— Йўқ,— деди Омон унинг билагидан ушлаб.

Азизанинг бадани дириллаб кетди. Дарров қўлини тортиб олди.

— Ўшанда юзимга ёмон ургансан-а.

— Айтдим-ку, у пайтда ёш бола эдик. Энди катта одаммиз. Энди ўша гапни айтсам урмайсанми?

— Гап билан ураман,— деди Азиза,— йўқ, урмайман, наҳотки сени урсам. Сени урадиганнинг қўли синсин.

Омон маст одамга ўхшаб каловлаб қолди. Кетма-кет уч марта қоқилди. Толнинг каллагига бошини уриб олиб дўпписини тушириб юборди. Осмонга қараб баркашдек ой баландлаб кетганини энди билди. Хўрсинди, гапи-гапига қовушмай қаёқдаги кераксиз гапларни алжий бошлади. Унинг бу ҳолатини қиз сезиб турарди.

Ҳозир у тош йўлдан битта-битта босиб ёлғиз келаркан, Омон ҳақида, ўзи ҳақида, юрагини ўртаётган алланималар ҳақида ўйлаб борарди.

Она уни кута-кута чироқни ўчирмай супа ўртасида аллақачон ухлаб қолганди. Қиз гулзор четидаги ўша супага ўтирди. Энгашибрайхоннинг бир шохини синдириди-да, димоғига олиб келди. Райхон иси уни чинакамига маст қилган эди. Унинг негадир ўкириб-ўкириб йиғлагуси келарди. Гуллар орасига кириб, чалқамча ётиб, қимирламай ойга қараб, то у ботиб кетгунча қараб ётгуси, шу гулларнинг ҳаммасини бирма-бир юзига суртгуси, ойнинг оқ ипак толасидек кўринмас нурларига чирмашиб ҳув ўша юлдуз тўла осмонга чиққуси, бутун оламга етгудек овоз билан қўшиқ айтгуси келарди.

Она супа ўртасида ширин уйқуда ётарди.

Э ғофил она, тур, қўзингни оч, қизингнинг юрагига қулоқ сол. Унинг қалбига муҳаббат келди. У эртага уйингни тарк этиб юрагига ўт солган йигит билан, унинг хаёллариликенг, этаги уфқларга туташган чўлларга ке-

тади. У ўша ерда муҳаббатидек соғ, қизлик иффатидек беғубор кишилар сафига қўшилади.

Муҳаббат шундай қудратли бир кучки, кимнинг қалбига йўл топган бўлса, уни ҳам ўз йўлига бошлайди.

Кўзингни оч, она, қизингга оқ йўл тила!

1959 дил.

СЕВГИНГГА СОДИҚМАН

Мактабдошим, балки мени унутиб юборгандирсан. Шундай қилишга ҳаққинг бор эди. Дилингни вайрон қилганман. Юрагингда уйғониб келаётган биринчи муҳаббат ҳисларини оёқ остига олиб тепкилаганман. Шундай бир енгилтак қизни албатта юрагингдан сидириб ташлагандирсан. Шундай қилишинг ҳам керак эди.

Кел, дўстим, юрагимни энди сенга очай. Тўлиб-тошган дарду ҳасратларимга қулоқ сол. Эҳтимол, менинг бошимга тушган фожия юрагингнинг аллақаерида кул босиб қолиб кетган муҳаббат ҳисларини уйғотар.

Бугун жуда сиқилиб кетдим. Дардлашадиган, юрагимни эзган алам-ситамларни эшигадиган дўст йўқ. Бугун бирдан сен ёдимга тушиб қолдинг. Бирга ўқиган, бирга ўсган мактабдошлар орасида негадир сени эсладим. Билсанг, сени назаримга ҳам илмас эдим. Сен билан бирга юргани одамлардан уялардим. Сени ерда, ўзимни осмонда ҳисоблардим. Эсингдами, мени кўпчилик ўртасида «қўғирчоқсан» деган эдинг. Шунда бисотимдаги

энг аччиқ, энг ярамас сўзлар билан ҳақорат қилгандим.

Кечир, кечир, азизим. Чинакам қўғирчоқ эканлигимни энди билдим. Ҳаётнинг сўқмоқларидан ўтишга ожиз, ҳар бир арзимас қийинчилик олдида эсанкирайдиган, маънавий қашшоқ одам эканлигимни энди билдим. Беҳуда ўтган болалигим учун бугун ўзимни қарфайман, кучим кўзимга етади-ю, юм-юм йифлаб ёш тўкаман.

Ўқишилар тугаганда, мактабдошлар ҳар қаёққа тарқаб кетишиди. Бири заводга, бири комбинатга кетди. Мен қўлимда етуклик аттестатим билан онамнинг эрка қизи бўлиб қолавердим. Бу орада яна икки йилни бой бердим. Ва ниҳоят, онамнинг елиб-югуриб топиб келган қалбаки меҳнат дафтарчаси билан университетга келдим. Бугун биринчи имтиҳондаёқ ким ва нималигим ўзимга маълум бўлди. Йиқилдим. Онам илмни менга сотиб олиб бермоқчи эди. У ҳалигача илмнинг пулга сотилмаслигини билмайди.

Кеча практикадан қайтиб келган иккинчи курс қизларининг ётоғига кирдим. Бирам қувноқ, бирам шаддод қизларки, ҳавасинг келади. Уларнинг бири ўн йилликни тугатгандан сўнг Оҳангарон конида пайвандчи, бири Марғилон ипак комбинатида йигириувчи бўлиб ишлаган. Уларнинг ҳар бири то университет остонасига етгунча ҳаёт сўқмоқларидан мустақил ўтган, қисқа бўлса ҳам анкетанинг бир четига ёзиб қўйишга арзигулик таржимаи ҳоли бор. Тўғриси ётоқقا кирдим-у, шу меҳнаткаш, жафокаш қизларнинг энсаси-

ни қотирдим. Бўйнимдаги шода-шода марваридлар, қўлимдаги ҳинд сумкаси ва тилла соат, маникюр қилинган қип-қизил тирноқларимни кўриб ҳайрон қолиши. Шунда, дўстим, сенинг қўғирчоқсан, деганингни эсладим-у, марваридларим занжир бўлиб бўйнимни қисаётгандек, қизил маникюрлар олов бўлиб бармоқларимни куйдираётгандек бўлди. Бир чеккада шумшук бўлиб уларнинг суҳбатига аралаша олмай ўтиредим. Улар ҳар тўғрида bemalol баҳслаша оладиган, нима тўғрисида гапирса, ўз фикрини исбот қила оладиган доно қизлар эди. Улар олдида мен ҳеч нарса билмайдиган, дунёга фақат зебизйнат, пардоз-андоз учун келган бир кимса бўлиб қолдим. Бир қиз оқ штапель кўйлакка дазмол босади, бири пайпоқ ямайди, бири ҳаяжонга тўлиб университетни битирганидан кейингина эрга тегишини, эри билан Қримга бориб, денгиз бўйларида саёҳат қилишини завқ-шавқ билан гапиради. У денгиз ҳақида гапирганда юзлари, кўзлари бирам ғалати бўлиб кетардики, беихтиёр эсинг оғиб қолади. Мен ойим билан Қримга икки марта борганман. Денгиз ҳақида, олис ўлкалар ҳақида ўй сурмай, орзу қилмай бу бахтга эришганман. Болалик хаёллари, орзуларидан бенасиб бўлиб улғайганман. Чунки, ҳали ўйламаган, ҳис қилмаган нарсаларим муҳайё бўларди. Мен учун онам ўйларди. Ҳаётнинг фақат силлиқ йўлларида юрганман, холос. Ҳозир Қрим соҳиллари ҳақида тўлиб-тошиб гапираётган қиз денгиз тўлқинларини, оппоқ кўпикларга тўш уриб учаётган оқ қушларни фикр кўзи билан кўриб турибди. Чунки унда қалб кўзи

бор. Менчи, мен одамлар мاشаққат билан етишадиган баҳтга жуда осон етишишга ўрганиб қолганман. Менинг юрагимда чўғ йўқ. Ҳеч ким ўт солмаган.

Ҳозир ётоқда қизлар ухлаб ётишибди. Тошкент осмонини тўлдирган саратон юлдузларига деразадан қараб ўтирибман. Ўзим ҳақимда ўйлаяпман. Мени шу кунгача қўлимдан етаклаб келган онам уйда қолди. Катта бир шаҳарда худди бир ўзимгина кимсасиз, кишиларнинг назарига тушмайдиган ожиз бир киши, бирор етакламаса бир қадам ҳам босолмайдиган бир киши бўлиб қолганлигим ҳақида ўйлаяпман. Ўз ўтмишимдан бирорга гапириб берадиган ҳеч нарса тополмадим-у, бирдан қўрқиб кетдим. Наҳот, таржимаи ҳолим йўқ. Дунёга келиб ҳеч нарса қилмай катта бўлиб қолсам. Бу ҳис менинг фақат жисмоний юксалган, маънавий пуч кимса эканлигимни билдириди. Қаёққа бораман, нима қиласман, қўлимдан нима иш келади? Шу турки-атвор билан кимга ҳам керакман.

Азизим, шундай кезларда, юрагимга яқин киши тополмайдиган бир пайтда сен ёдимга келдинг. Эсингдами, каникул тугаб ўқишлиар бошланганда «Ёнимга келма, мол боққансан, сендан тезак ҳиди келяпти» деб жирканардим, кошки эди, болалигим қайтиб келса-ю, мен ҳам сенга қўшилиб, колхоз подасини ҳайдасам. Адирларда, жар ёқаларида ўтга юмалаб сенинг белбоғингга тугилган кулчани сувга ботириб есам, қўзичоқларни бағримга боссам, қийнаб-қийнаб қўйиб юборсам-у, онаси кетидан сакраб-сакраб югуришини томоша қиласам.

Қишлоғимиз этагидаги адир тепасига чиқиб узоқларда ёнган чироқларни томоша қилсак, пинжингга суқилиб ҳу олисда қичқириб кетаётган поезд орқасидаги қизил чироққа қара-сак. Шу темир из туташган олис ўлкалар ҳақида икковимиз ўй сурсак...

О, дўстим, шу дамларни бой бериб қўй-ганман. Энди ҳаётимни қайтадан бошлашга уриниб кўрсам, дейман. Ё кечикдимми?

Имтиҳон комиссиясидан ҳужжатларимни қайтариб олдим. Онам топиб келган қалбаки меҳнат дафтарчасини йиртиб ташладим. Ҳаёт билан баробар қадам ташлаётган, ўз баҳтини ўз меҳнати билан яратайтган кишилар орасида қоқилиб яшашни истамайман. Мени табрикли, оқ йўл тила. Эртадан менинг ҳам таржимаи ҳолим бошланади, ҳақиқий меҳнат дафтарчасига исмим ёзилади. Тирноқларимдаги қизил бўёқларини қириб ташлайман. Шу тонг Тошкент устида ҳайқирадиган биринчи гудок-юз, минглаб меҳнат кишилари қатори мени ҳам уйғотади, ишга чақиради. Энди меҳнат нонини, ўз меҳнатимнинг нонини ейман. Менга ҳақиқий ҳаёт, чинакам инсон ҳаёти қайтиб келди. Билсайдинг, муҳаббатингга, илиқ-ис-сиқ сўзларингга зорман.

Қадрдон дўстим, азизим, мени сев, сев-гингга содиқ бўламан!

Тонг отяпти. Юлдузлар бирин-кетин ўчяпти. Ҳадемай офтоб юз кўрсатади. Ҳу ана, чинор учлари йилтираб қолди.

Умримда биринчи мартаба тонгни орзиқиб кутиб оляпман. Ҳа азизим, бу тонг ростдан ҳам янгидан туғилаётган дўстингнинг ҳаёт тонгги бўлиб қолади.

1959 йил

ХОДИВОЙ

Теримга тайёргарликнинг бориши ҳақида
Ҳодивой раис ахборот берар экан, пастдан
луқма ташлаб унинг гапини-гапига қовушти-
ришмади.—«Ҳой, Ҳоди, сенсиз тайёргарликни
кўриб қўйғанмиз. Яхшиси курортда қанақа
дам олганингни гапириб қўя қол!

Раис «гапирайми-йўқми, бирпас хап тур-
санглар-чи» дегандек қилиб залга қошини
кериб, елкасини қисиб қаради.

— Пилла хусусида тил қисиқлик жойим
йўқ. Планни бир юз ўн бир процент қилиб
қўйғанман. Паҳтани ҳам бир юз ўн бир бўл-
маса ҳам юздан оширишим турган гап. Рай-
ондаги катталарга шунақа деб ваъда берган-
ман. Чорвом ёмон эмас. Ҳар сигирдан етти
юз литрдан соғиб олсак...

Раиснинг гапи оғзида қолди. Ўрта қаторда
ўтирган ойболта соқолли киши луқма таш-
лади:

— Уни ундоқ бажардим, буни бундоқ ба-
жардим, деяпсан. Қойилмиз. Нега энди сут
масаласига келганда «мунча соғиб олсак»
дейсан? Уни ҳам соғиб олсам, дея қол!

Раиснинг жон-пони чиқиб кетди.

— Уста, асқияни чойхонага чиқиб қиласиз. Бу мажлис. Гапингиз бўлса панада сасимай манави ёққа чиқиб гапиринг!

— Шунақами? Мажлисчасига гаплашайми? Менга сўз беринглар!

Уста елкасига ташлаб олган чорсисини белига сириб боғлаб, минбарга чиқди.

— Ҳодивой, аччиғинг чиқмасин-ку, анчадан бери гапингдан латта ҳиди келадиган бўлиб қолган. Энди сен айтадиган гапингни дилингда пухталаб тур. Қизишиб кетсанг, мендан кейин яна сўз оласан.

Уста мажлис аҳлига қараб бирпас ўйланаб турди-да, гапира кетди:

— Йигирма уч йилдан бери колхозда аъзо бўлиб биринчи марта даврага чиқиб гапиришим. Гапим мажлиснинг гапига ўхшамаса айбга буюрмайсизлар. Хўш десангиз, мана шу раисимиз Ҳодивой билан болаликдан тепкилашиб ўсганмиз. Бир отинойида ўқиганмиз. Аммо, Ҳоди болалигида ҳам сал ғўдайганроқ эди. Шунинг учун ҳам ўртоқларимиз уни Ҳодивой отига мослаб «Ходавой» деб аташарди. Шу отинойининг Тўхтахон деган кекиртагидан оқма қизи бўлгувчи эди. Кимки уни опичиб юрса, ўқишдан озод бўлар эди. Ҳодивой ҳар куни уйидан ёнғоқ, туршак олиб келиб ҳаммадан олдин Тўхтахонни опичиб оларди-ю, кечгача маза қилиб йўқ бўлиб кетар эди. Ҳодивой тахтадан ҳафтиякка ўтибдиямки, елкасидан Тўхтахон тушмади.

Пастдан, керакли гаплардан айтинг, одамларнинг вақтини бекорга олманг деган овоз чиқди.

— Шошилманглар. Бердисини айтгунча сабр қилинглар. Бу Ҳодивойнинг болалигидаги шайтонлигидан бир ҳикоя, холос. Энди, ҳозиргисини айтамиз. У то раис бўлгунча селсоветнинг ўғлини опичиб юрарди. Исполкомнинг қайниси ўғил тўйи қилганда тўй болани опичиб гулхан атрофидан айлантирган ҳам шу Ҳодивой эди.

Залда ғовур-ғувур гап бошланди. Устанинг гапларидан энсаси қотиб ўтирган Ҳодивой раис «шахсиятга тегилмасин» деб қўйди.

— Хўп, жоним билан,— деди уста қўлини кўксига қўйиб,— энди колхоздаги ишлари ҳақида гапираман. Ҳодивой, пилла планини бир юз ўн бир процент қилдим, дейди. Зинҳор қилдим, демасин, қилдик десин. Планни тўлдирганлар бошқа. План мана шу бир юз ўн бир процент бўлгунча, йигитларимизнинг пешонаси юз ўн биттадан ғурра бўлди. Сабаб, раис супрадаги унга қарамай тандирга ўт қалайдиган хилидан. Колхоз ерини дурбин билан қидирсанг ҳам тут дарахтидан нишон топмайсан. Акам орқа-ўнгларига қарамай, қурт уруғига зўр берадилар. Қурт даҳага кирдими, колхоз араваси кетма-кет шаҳарга фириллайди.

Маҳаллама-маҳалла изғиб, ўсма кетди, сурма кетди деб юрадиган чор бозорчига ўхшаб бирорларнинг тутини кесиб юради. Кестиришга бирор унайди, бирор унамайди. Ана бир йил кестиради, икки йил кестиради. Наинки ўн йилдан бери аҳволимиз шу бўлса! Бу йил эрта кўкламда қанақа ҳангомалар бўлдики, барг кесиб келган давангидек йигитларнинг кўпи шаҳарлик хотинлардан калтак еб,

чаккасини ғурра қилиб келишди. Инсоф ҳам керак-да! Шу ўн йил ичида кўчат ўтқазганимизда биласизми, қанақа катта тутзор бўларди? Гапирганмиз. Қулоқ солмаган. Шаҳарда маржондек оппоқ бўлиб турган тутини кестириб қўядиган анойилар бор-да! Энди яна битта гап: ўтган йили пахтани қойил қилдим, дединг. Ҳоди, мингбаъд мундай дема! Қойил қилдик, дегин. Экканлар ҳам, терганлар ҳам бошқа. Сен чигит экканимизда жағингга тилла тиш қўйдиргани Марғилонга кетган эдинг. Авжи ғўза парвариши вақтида қайтиб келдинг. Далага чиқмай бир-икки ҳафта уйингда қайнатма шўрва ичиб ётдинг. Ғўзани кўндалангига ишлаётган универсалчи ни ёнингга олиб «Волга» олгани Тошкентга кетдинг. «Волга»га тушиб йўл-йўлакай Шоҳимардонми, Почча отами роса айланиб келдинг. Кўзингни оч, бу йил мунақаси кетмайди. Кузда ҳашарчини пахтага йўлатмаймиз. Машинада ўзимиз терамиз. Терим машинаси деса, қийшанглайдиган бўлиб қолибсан, бу қилиқ қаёқдан чиқди? Эгнингдаги посон костюминг агар қўлда тепчиб тикилган бўлса киярмидинг? Машина зотидан автомобиль билан телефондан бошқасини тан олмай қолибсан. Ҳўв, кўзингни оч, бола. Бу йил ҳам курортни канда қилмадинг-а! Энди дамингни олган бўлсанг, далага чиқ! СХМ лардан хабар ол, устахонага кир, хирмонларни кўр! Бултургига ўхшаб комиссияга нариги колхознинг гуриллаб кишина бўлсанг, турган машиналарини меники деб кўрсатиб юрма! Бўлди энди лўттилик! Гапим тамом! Шахсиятингга теккан бўлсан, хафа бўлсанг ҳам, хафа бўлмасанг ҳам ўзинг

биласан! Ҳодивой отингни Ҳодавой деганимга тавба қилдим.

Устанинг гапи қийқириқ чапак билан тугади. Раис бир қизариб, бир бўзарди. Сўзга ёзилганлар қолиб раиснинг шофири минбарга чиқди.

— Кечирасизлар, Абдукарим раиснинг лаганбардори, роса кўпиртирса керак, деб ўйларсиз. Раисдан тўққиз пуллик қарзим йўқ. Эртадан кечгача эшигининг тагида пойлаб ўтириш жонимга тегди. Гапнинг сирасини айтгани сўз олдим. Шу ўтирган қоракўзларга битта саволим бор: колхознинг янги самовардай йилтираб турган «Волга»си қани?

Одамлар бир-бирига қарашибди. Шивиршивир гап бошланди.

— Каердалигини ўзим айтаман. Раис хотамтойлик қилиб «Волга»ни селхозснабнинг каттаси Икромовга инъом қилганлар.

— Жуда ҳам сахийликлари тутиб кетган экан-да!— деди уста пастдан туриб.— Индамасак, бутун бошлиқ колхозни ҳам қизларига сеп қилиб бериб юборишдан тоймайдилар.

Мажлис раиси қўнғироқ чалди. Ҳодивой тўнғиллади.

— Уста, кесатмасдан гапирилсин. Агар малол келаётган бўлса ҳақини тўлаймиз.

Шофер ғовур босилишини кутмай сўзини давом этдираверди:

— Шу яп-янги машинани селхозснабнинг бир шалоқ «Газ»ига айрибош қиптилар. Бурнидан тортгандек аранг судраб олиб келдик. Буйруқни қаранг! Курортдан келгунимча ремонтдан чиқазиб қўй, эмиш. Бир ярим ойдан бери овораман. Тузаладиган балога ўх...

шамайди. Бухгалтер пул бериб чарчади. Мен запчаст қидириб чарчадим. Ўн қадам юрмай орқасидан тутун чиқазиб тўхтаб қолади. Тунов куни раисни кутгани станцияга миниб чиққан эдим. Бир ўлимдан қолдим. Темир йўлнинг устида тақقا тўхтаб тутун қайтарса бўладими, у ёқдан поезд келяпти, тўрт киши аранг орқасидан итариб силжитиб олдик. Жон акалар, мени бу штатсиз шоферликдан кўпчилик бўлиб, ё ҳайданглар, ё яхшиликча бўшатиб қўйинглар. Эрта-индин терим бошланади. Шу машина деб СХМнинг ремонтига қўлим тегмаяпти.

Раис президиумда ўтириб унга ўшқирди:

— Шунча дарди-ҳасратинг бор экан, нега ўзимга айтмадинг!

— Айтганман, айтганман ака, терим машинасининг ремонт қолиб кетяпти, деганимда айтган гапингиз эсингиждами?

Раис довдираф қолди.

— Нима деган бўлсам дегандирман. Ўзаро гап у, мажлисга соладиган гап эмас.

— Худди мажлисга соладиган гап шу бўлади: ўшанда «ремонт қилсанг қилмасанг барибир, паҳтани қўлда терамиз» дегансиз. Эсингида борми? Қайнатангизнига фермадан қўй олиб кетаётганимизда кўприкнинг тепасида айтган эдингиз.

— Йўқ, унақа гапни айтмаганман. Ёлғон гапирма!

Шофер йигит қизишиб кетди:

— Мени ёлғончи қилманг, айтгансиз! Шунча вақт хизматингизни қилиб, энди ёлғончи бўлдимми? Билиб қўйинг, терим машинасини ремонт қилишдан олдин кўпчилик бўлиб,

ўзингизни ремонт қилиш керакка ўхшаб қолди.

Ўтирганлар гуриллаб кулиб юбориши. Олдинги қаторда иягини ҳассасига тираб ўтирган бир чол гап қотди.

— Йўқ, болам, бу Ҳодивой ремонт қилишга арзимайди. Халқда эскини эплагунча эсинг кетади,— деган гап бор. Яхиси раисни машинанинг қадрига етадиган янги раисга айрибош қилиб қўя қолган маъқул.

Шу гаплардан кейин сўзга чиқмоқчи бўлиб қўл кўтарганларнинг сони кўпайиб кетди. Мажлис раиси «Бухгалтер Қорабоев сўзга тайёрлансан» деб 15 минут танаффус эълон қилди.

Эртасига колхоз самоварида латифага ўхшаш бир гап бўлди.

Ҳодивой раисликдан олинишига кўзи етгандан кейин правление аъзолариға бир шарт қўйган эмиш: «Раисликка ўрганиб қолганман. Машинани, печатни, телефонни, ёрдамчини олмасанглар раисликдан тушаман, бўлмаса кўз олдиларингда печатни лиқ этиб ютиб юбораман, қўяман».

Унинг бу шартига уста ака чистон қилиб жавоб берибди:

— Майли ютсанг ютвора қол. Колхоз печатини худа-беҳудага боса бериб сийقا қилиб, хатларини ўқиб бўлмайдиган қилиб юборган экансан. Бошқасини ясатиб оламиз.

Аммо, лекин кўз олдимизда ютасан.

Ҳодивой печатни ютиб юбордими, йўқми, уни ҳеч ким билмайди. Аммо, раислигидан олингани рост. У ҳар куни самоварга чиқиб,

олдига бир чойнак кўк чойни қўйиб, ҳадеб янги раисни чалпийди.

— Раис бўлиб машинада керилиб ўтириши билмаса, муовини бўлмаса, печать деганни аввал оғизнинг ҳовури билан намлаб, кейин босишини билмаса, подписи ҳам кўримсиз, қизил қалам турганда кўк сиёҳга бало борми?

Самоварчи ҳам ҳазилвон бола экан, сўри тагида ётган эски эгарни Ҳодивойнинг олдига келтириб қўйди:

— Ҳодивой ака, отдан тушишга тушдингиз, энди ремонтдан чиққунингизча ҳеч бўлмаса манаву эгарга миниб ўтиринг.

Ҳодивой унга еворгудек бўлиб ўқрайиб қаради. Кейин жаҳл билан эгарни тепиб юборди.

1959 йил.

М У Л Л А Ж О Н

Қап-катта одам кўпчиликнинг уртасида «ҳўнг-ҳўнг» йиғласа жуда хунук бўлар экан.

— Қўйинг, Муллажон, астойдил севса қайтиб келади.

Муллажон тасалли бераётган кишига қараб нимадир демоқчи бўлди, аммо ўпкаси тўлиб томоғидан гап ўтмай энтиқди, мўйловининг кўз ёшидан ҳўл бўлмай қолган бир учи сал-пал қимиirlади.

— Қайтиб келади, агар айб ўзида бўлса албатта қайтиб келади.

Муллажон умидсиз бош чайқади.

Қўлига чамадон ушлаган ўрта ёшлардаги бир хотин қелиб уйга кириб кетди. Бу Муллажоннинг хотини Башорат эди.

Муллажон ўрнидан туриб хотинининг кетидан ҳовлига кирди.

— Ҳой хотин, тавба қилдим, энди ичсам, бирордан пул олсан гўримда тўнғиз қўпай.

— Эски гап. Бу гапларни жуда кўп эшигандман. ЗАГС қоғози қани?

Муллажон бирор човт солаётгандек ён чўнтагини ўнг қўли билан ушлади.

— Эркак бошим билан оёғингга йиқила-ман.

Хотин юзини тескари ўгирди.

— Бир йилнинг ичида ўн бир марта оёғимга йиқилдингиз. Энди йиқилсангиз пешонангизни қашқа қиласиз. Қўйинг энди, ЗАГС қоғозимни беринг.

Томга одам йифилди. Бу маҳаллада Муллажоннинг ҳовлисига одам йифилиши одат тусига кириб қолган эди. Кўчадан ўтган одам тинчлик бўлса ҳам «Falva чиқмадимикин» деб албатта эҳтиёт шартидан уларнинг ҳовлисига кўз ташлаб ўтади. Бугунги шовқинга айниқса одам кўп йифилди.

Ўлгундек ичиб кўз ёши қилаётган Муллажон ҳовлидаги ер ўчоқقا оёғини осилтириб ўтирас, ҳадеб раҳми келармикин деган хаёл билан бир кўзини сал қисиб, тилини чиқазиб ўталаради.

— Бермайсизми?— деди хотин унинг олдига келиб қатъий товуш билан.

Муллажон унинг кўзига мўлтираб қаради. Бу қараваш Башоратга сира-сира таъсир қилмади. У Муллажон билан етти йил турмуш қилган бўлса ҳамма вақт Муллажон қилғуликни қилиб қўйиб, хотинининг кўзига мўлтираб қараб, гуноҳини енгиллатиб келарди.

Бу гал ҳам унинг мўлтираб қараши хотинида шафқат эмас, ғазаб қўзғатганига ишонмасди. Муллажоннинг кўриниши шу аҳволда бўлса ҳам кўнгли мутлақо хотиржам. У, «бир пов этиб ёнади-ю, ўчади, хотинларнинг жамийкиси шунаقا бўлади» деб ўйлар эди.

Бугунги жанжал нимадан чиқди? Тўплан-

ган одамлар бу можарони аввалгилариға сира ўхшамаслигини билиб қолишиди.

— Ахир, мен ҳам одамман. Резинкани ҳам ҳадеб чўзаверсанг охири узилади. Ҳа, турмуш бўлмай ўлсин, бу! Наҳотки, етти йил яшаб бир кун ҳузур-ҳаловат кўрмасам-а!

Башоратнинг гапини эшигдан Муллажон ўчиқнинг четига тиралиб ўрнидан турди.

Бунақанғги ғовғалар жонига теккан қўши ни хотин қўлини пахса қилиб Муллажоннинг олдига келди.

— Менга қаранг, қўши. Маҳалладан кўчиб кетсак тинчиймизми, а? Бизни-ки шунча жондан басир қилдингиз, тагин ҳам Башоратнинг жони пўлатдан экан.

— Сиз аралашманг, эр-хотиннинг ўртаси-га эси кетган тушади.

Гапга Башоратнинг ўзи аралашди.

. — Артелда тўрт минг растрат қилди, оёғимга йиқилиб, мана шунаقا кўзини мўлтиратиб туриб олди, ҳар нима қилса эrim дедим, тилла соатимни сотиб тўладим. Алла-қайси складда уч ой ишлаб икки минг олти юз қарз бўлди, яна кўзини мўлтиратди, иложим қанча, шўрим қурсин, эrim экан, гила-мимни сотдим. Атда ишлади, уч минг, батта ишлади, бир ярим минг қарз бўлди, бори-йўғимни сотиб битирдим. Бугун бир варакайига уч киши пул қистаб келса бўладими, хотиним беради, деб олаверипти. Шунча пулни қаердан оламан? Қилгуликни қилиб қўйиб яна кўзини мўлтиратади-я. Унинг устига тилини чиқазиб йўталадиган одат чиқазибди.

— Раҳми келармикин, дейди-да,— деди қўши хотин.

Ҳамма хохолаб кулиб юборди.

— Сен гапга аралашма, бош юваётганингда томдан қараганман, бўйнингда совун кўпирмас экан, сенга ким қўйипти гапга суқилишни.

Бу гапнинг ҳозир бўлаётган ғовфага нима алоқаси борлигини билмаган кишилар «эгри мўридан — эгри тутун» деб индамай қўя қолишиди.

— Ўзимни осаман! — деди Муллажон хотинига қараб.

Башорат қарзга сотилиб кетган бузоқнинг шафтолига осиғлик арқонини олиб унинг олдига ташлади.

— Вой, бу нима қилганингиз, нақ ўзини осиб қўяди-я, — деди кимдир Башоратнинг қулоғига шивирлаб. Башорат унга «хотиржам бўлинг» дегандек қараб қўйди.

Муллажон арқонни қўлига олиб яна тилини чиқазиб йўталди. Қўзини сузиб хотинига қаради. Назарида хотин юмшамайдиган кўринди.

— Майлими? — деди Муллажон.

Хотин индамади. Муллажон белбоғининг қатидан носқовоғини олиб, кафтини тўлдириб нос отди, хотиржам юриб келиб айвоннинг даҳанига ўтириди.

— Гапнинг очиғини айтайми? Қўядиган хотиним йўқ! Менга қара, Башорат, мени охирги марта хижолатдан қутқар, атиги ўнбир юз сўм керак. Зирағингга харидор топдим. Шу қарздан узилай, ундан кейин гўшт дўконига ишга кираман, еганинг пешноб, кийганинг атлас бўлади.

Башорат, «эсиз одамгарчилик» дегандек

унга бир ўқрайиб қаради-ю тарс-турс юриб, ҳовлидан чиқиб кетди. Боятдан бери ҳурпайиб, қулоғини қашиб ўтирган бароқ мушук Муллажонга «хайир» дегандек қисқагина бир миёвлаб хотинга эргашди.

Шу билан ҳикоя битди. Балки ўқувчи, Башорат-ку кетди, у ўтли-шудли хотин экан, ўзини эплаб кетади, бироқ Муллажон нима бўлди, тузалиб одам бўлиб кетдими?— деб сўрар.

Кечаги дам олиш куни Муллажонни товуқ бозорида кўриб қолдим, чоғимда уришадиган хўроз қидириб юрган эди, шекилли.

1956 йил.

- - -

ПОРАХУРНИНГ ҮЛИМИ

Магазиннинг мудири Ҳомидхўжа тушкўрса, тушида ўлиб қолган эмиш.

Қабрга мункарнакр кириши билан у бoshини кўтариб ҳайрон қолди. Қўлида проводникларнинг фонарини ушлаб турган бу одам қиёфатидаги киши район савдо бўлимининг инспектори Каримовга ўхшаб кетар эди. Каримов билан Ҳомидхўжанинг ораси бузуқ эди. Чунки Ҳомидхўжа «Рубин» телевизорига нарх қўйиб сотаётганида шу Каримов ушлаб олган ва ишини судга берган эди. Ҳомидхўжа гулдираб ўрнидан турмоқчи бўлди.

— Ўртоқ Каримов!

Каримов мункарнакр гурзисини кўтарди.

— Кўзингни оч, Ҳомидхўжа, сен ўлгансан. Нима гуноҳ қилгансан, шуни айт!

— Ҳеч гуноҳ қилмаганман.

— Ёлғон гапирма. Пора олгансан, пора бергансан, эсингдами?

Каримов мункарнакр авторучкаси билан обший дафтарга «дўзахга тушсин» деб

ёзиб қўйди. Шу пайт иккита фаришта унинг икки қўлтиғидан кўтариб олиб кетди. Фаришталарнинг бири худди унинг ишини судга оширган терговчига ўхшарди.

Ҳомидхўжа дўзахда ўзидан олдин ўлиб кетган, умрини пора олиб ўтказган ўртоқларидан биронтасини ҳам тополмади. Ўзидан ўзи «фақат мен пора олибманми, адолат борми, йўқми» деб диққат бўлар эди. Шундай қилиб Ҳомидхўжа гоҳ қил кўприкдан ўтиб, гоҳ ўтда куйиб юаркан, бир нарса эсига келиб қолди. Жаннатга ўтиб кетишнинг иложи йўқмикин? У шундай хаёл билан каттакон оловли дарвоза олдида махорка чекиб, қурт сотиб ўтирган қоровул чолнинг олдига борганини билмай қолди.

— Ҳа, бўтам, нима гуноҳ қилган эдинг?— деди чол.

— Пора еб қўйгандим.

Чол махорканинг аччиғидан тез-тез йўталаар, папирос тополмаётганлигидан шикоят қиласар эди. Ҳомидхўжа дарров ёнидан бир пачка «Қазбек» чиқариб чолга узатди.

— Ўзи асли жаннатбоп бола экансан-у, дўзахга янгилиш тушиб қопсан-да. Жаннатга киргизиб юборардим-ку, жиндак харажати бор-да.

Ҳомидхўжа шу топда бу чолга танасида тирик вақтидан ортиб қолган жонининг юқини ҳам сувга чайқаб беришга рози эди.

— Ота, бир нима берай десам ҳеч балойим йўқ-ку.

— Ху, жағингда йилтираб турган иккита тилла тишинг бор экан-ку?!

Ҳомидхўжа қўлинини оғзига тиқиб тишлари-

ни шартта суғуриб олиб бирор кўрмасин учун кафтини чанглаб туриб чолга узатди.

— Қўрқма, бўтам. Порахўрлик ёруғ дунёда айб, бу дунёда айб ҳисобланмайди. Қани ўтавер, жаннат ўзингники!

Ҳомидхўжа жаннатга кирди-ю, оғзи очи-либ қолди. Бир одам беш панжасини ёзиб жаннатнинг ўртасида ўзидан-ўзи алжиг юради. Ҳомидхўжа жаннатнинг самоварчисидан сўради:

— Бу одам нега қўлини кўтариб, панжасини ёзиб юрибди.

— Э сўрама. Бу одам поранинг орқасидан олтита участка солган, еттинчисини қураётганда тунукасоз билан уришиб томдан йиқилиб ўлган. Ҳамма вақт «еттига участка қурдим, барibir ёруғ дунёдан қўлим очик кетди», деб жавраб юради.

Ҳомидхўжа жаннатда қанча юрганини билмади. Бу ерда порахўрларнинг иши йирик, экан. Ҳомидхўжа тирик вақтида ҳали ўлмаган Мирвали деган бир муовини бўлгувчи эди. Уша муовини Мирвали жаннатнинг бозорида гилам сотиб ўтирибди.

— Ҳой бола, қачон ўлдинг?

Мирвали қўл силтади.

— Сиз тирик вақтингизда ҳам шу томонларга эплаб келиб-кетиб турардим.

Ҳомидхўжа Мирвалининг уддабурро бола эканини яхши биларди. Райторгнинг мудирига порани ўзи олиб боришдан қўрқиб, шумуовини орқали бериб турарди.

— Ҳой ука, ёруғ дунёда пора масаласи қалай?

— Порадан гапирманг. Пора берган ҳам, олган ҳам қия бўлиб кетялти.

Ҳомидхўжа шу пайтгача бир амаллаб тирилсам-у, яна битта яхлитроқ пора олиб ўлсан армоним йўқ эди, деб юрган эди. У Мирвали билан гаплашгандан кейин пора олмайдиган, пора бермайдиган оламда яшашнинг қизиғи қолмаганини билиб тақдирга тан берди.

Кечани Одамотони жаннатдан бенасиб қилган буғдойзорда, кундузни уни шарманда қилган анжирзорда ўтказишга қарор қилди.

Ҳассасини иягиға тираган бир чол ариқ бўйида ўтириб ўзидан ўзи ғулдиради.

— Бу порахўрлар жаннатни ҳам расво қилди. Анжирнинг сояси шуларники, фаришталарга ҳам унча-мунча бермасанг дўзахга отади.

— Оббо!— деди Ҳомидхўжа,— эпласанг жаннатга туш-да, ифвогар!

— Э, ҳа,— деди чол Ҳомидхўжани ҳассаси билан туртиб,— сенлар келиб жаннат дўзах бўлди, қадамларинг етган жой нақд дўзахнинг ўзи бўлади. Бор-е, жаннат сенларга бўлсин, ўша дўзахга мен туша қолай.

Чол Ҳомидхўжани савалаб кетди. У қочаман деса оёғи юрмайди, додлайман деса овози чиқмайди. Ҳомидхўжа бўғилиб хириллаб кўзини очди. Тепасида муовини Мирвали унинг бошини ушлаб турарди.

— Хўжайин, сизга нима бўлди?

— Қачон тирилдинг?— деди Ҳомидхўжа унга тикилиб.

— Ўлмай туриб тириламанми, ҳўжайин?

Дўконни ревизия босди, Каримов ревизия қиласмиш.

Ҳомидхўжанинг кўзига мункарнакр кўринди. Ундан кейин хира парда орқасида фариштага ўхшаган терговчи пайдо бўлди.

Ҳомидхўжа энди ўзининг ўлиқ-тириклигини аниқ билмасди...

ХОМ СУТ ЭМГАН ТАНҚИДЧИ

Билмайин босдим ҳиканни —
тортадурман дардини...
(Кўшиқ)

Сочлари пешонасидан ошиб, қош-кўзларини босиб кетган бараваста қоматли танқидчи Анжирбоев қўлида тутамлаб турган бир даста қофозни зарда билан столга урди.

— Тавба, бу ёзувчиларга нима бўлди-а?
Тирик тилни билмайдилар.

Анжирбоевнинг қаршисида бурнининг учини тер босган ёшгина бир йигит ўтирибди. У гўё қочиб кетишни мўлжаллаб тургандек қия очиқ эшикка тез-тез қараб қўяр, кўзларини бетиним пирпиратарди.

Анжирбоев бояги столга ташлаган қофозларни шер ҳамласи билан яна қўлига олди. Ҳамма ёғи савол аломати босиб кетган қофозларга бир-бир кўз югиририб, аччиқ данак егандек юзини тириштирди.

— Сиз ҳам тирик тилни билмайсиз, ука.
Ҳаётга боқинг, гигант қурилишларимизга бир назар ташланг. Тирик тилимизни ўрганинг. Сизда сўз жумласи ёмон, бундай ҳолларга қачонгача муросасозлик қилиб қеламиз. Халқ творичествоси ёзувчиларимизга мўл-кўл тема-

лар беради. Олинг ҳикоянгизни, бўлмайди.
Чеховни кўпроқ ўқинг!

Йигитча Анжирбоев узатган қофозларни олиб қўрқа-писа кўздан кечирди. Ҳикоянинг тагига чизилмаган, ёнбошига савол аломати қўйилмаган сатри қолмаган эди. У овоз чи- қазмай, йўталиб қўйди ва дастрўмолини чиқазиб бурун учидаги тер томчиларини артиб олди.

Анжирбоев бармоқларини навбат билан букиб, шақирлатиб бўлгач, дона-дона қилиб сўз бошлади.

— Бўлмайди. Бу мутлақо ҳикоя эмас. Нихоятда паст савия билан ёзилган. Бундай ҳикоялар ҳақида Добролюбов ундоқ деган, Чернишевский мундоқ деган, Белинский народникларни фош қилганда, Герцен дилетантларга зарба берганда... Интеллект, прообраз... Нима деяётган эдим? Ҳа, ҳикоянгиз хом, фирт хом. Чехов тирик бўлса ҳикоянгизни ўқиб, қулоғингизнинг тагига бир тарсаки туширади.

— Кечирасиз,— деди йигитча сал дадилланиб,— бу Чеховнинг ҳаммага машҳур ҳикояси-ку, ўртоқ Анжирбоев. Мен фақат сиздан бир нарсани сўрамоқчи эдим, драма тўгарагида Чеховнинг шу ҳикоясини саҳналаштиromoқчи эдик, нима деяр экансиз деб... маслаҳатга...

— Ҳа, хом сут эмган инсон!— деди Анжирбоев пешонасига тушиб турган паришон соchlарини тутамлаб,— майли, майли, ука, билганингизни қилинг.

МУЗИКАЛИ ВОҚИА

Ширинбулоқ район театрининг директори ишни барбод қилгани сабабли вазифасидан бекор бўлиб, ўрнига күшхона директорининг хўжалик ишлари бўйича ўринбосари ўртоқ Саллохов тайинланди.

Ўртоқ Саллохов томоша вақтида саҳна четидан туриб залга қаради. Одам кам. Дирижер тескари қараб, ҳадеб таёқчасини ўйнатарди. Саллохов чолғувчиларга қаради. Фақат фижжакчигина камон тортар, чилдирмачи ҳар замонда бир «так» этиб чертиб қўяр, карнайчи эса бир четда мудраб ўтираси эди. Саллоховнинг зардаси қайнаб кетди. Орқадан айланиб чолғувчиларнинг олдига тушди.

— Бу қанақаси, ухлагани келганмисизлар, қани, ҳаммангиз бараварига чалинг! Мунақада қачон молия плани тўлади. Уялмайсизларми, ҳамма ишни битта фижжакчига ташлаб қўйгани. Бугундан кейин ҳар қайсингизга норма белгилаб қўяман. Ёнингизда табельчи ўтиради. Ким қанча чалганини алоҳида ҳисобга олиш керак. Бунақада яна план тўлмай қолиши мумкин. Бизнинг күшхонада

цехга битта мол келса ҳамма баравар ёпишар эди.

Бирининг қўлида пичоқ, иккинчисида болта, учинчиси шохидан тутади. Ҳа-ҳу дегунча молнинг калла-почаси ажратиб олинади. Бу ердачи, тартиб йўқ. Хўш, сиз бу ерда нима қилиб ўйнаб ўтирибсиз?— дирижерга юзланди,— томошабинга ҳалақит беряпсиз.

— Кечирасиз, ўртоқ Саллохов, биз композитор айтганини қиласми. Композитор қайси чолғувчи қачон чалишини кўрсатиб берган, мана нотаси.

Саллоховнинг тепа сочи тикка бўлди.

— Бу қанақаси, бу ерда композитор директорми, менми? Композиторнинг буйруфи бекор қилинади. Қани, квартал плани тўлгунча ёппасига марш!

1956 йил.

УЗУН ТИЛ

Қобилжон директорнинг кабинетидан латтадек бўшашиб чиқди. У қабулхонада ўтирганларга лоқайд бир назар ташлади-ю, тез юриб коридорга чиқди.

— Сийлаганни сигир билмас. деб шуни айтади-да. Ишга янги келганда идоранинг пасти-баландини таништирган ким эди. Мишмиш гапларни қулогига етказиб турган ким эди, шуни билмади-я. Уялмаганини қаранг, уни одам қилгунча қоққанда қозиғим, осганда чўмичим қолмади.

Қобилжон коридорнинг у бошидан-бу бошига ўзидан-ўзи ғўлдираб шу тарзда бориб-келиб туради.

Кадрлар бўлимининг эшиги очилиб қўш кўзойнак таққан ўрта ёшли бир киши чиқди.

— Э, Қобилжон, нима қилиб юрибсиз,

хужжатларингизни қачон расмийлаштирасиз?

— Қанақа хужжат?— чўчиб сўради Қобилжон.

— Ишдан бўшатишга буйруқ бўлди.

Қобилжоннинг кўзларидан ўт чақнаб кетди. Директорнинг бояги «Ишни эплаёлма-

ётибсиз, бўшатишга тўғри келади» деган гаплари эсига тушди. «Еган ёғу гўштларинг кўр қилади ҳали сени, шунча совға-саломларни ҳам андиша қилмадинг!»— деб кўнглидан ўтказди-ю, кўзойнакли кишига қараб:

— Ҳар қалай закон биладиган кишисиз, бир йўл кўрсатинг,— деди.

— Нима десам экан, қани баққа юринг-чи, буйруқда нима дейилган экан.

Улар бошлишиб кабинетга киришди. Кўзойнакли киши стол устида уюлиб ётган қофозлар орасидан буйруқни ҳониб Қобилжоннинг қўлига берди. Қобилжон енгил титраб турган қўллари билан қофозни тутиб ўқий бошлади.

— «...Ишни эплай олмагани учун...» Ҳмм.

— Жуда хунук буйруқ бўпти-да, шу буйруқ мазмунини меҳнат дафтарчангизга ёзиб қўйишим керак. Закон шунаقا, акаси.

Қобилжон бўшашиб стулга ўтириб қолди. Жовдирауб турган кўзларини шифтга тикиб, остки лабини тишлади.

— Бошқа иложи йўқмикин-а?

— Хўжайин билан дурустроқ бир гаплашиб кўринг-чи, балки буйруқни ўзgartар, жуда бўлмаса «ўз аризасига биноан» деган мазмунда...

Қобилжон ўрнидан турди. Аста-аста юриб, кўчага чиқди. У ўйлар эди: «ишни эплолмагани учун... Меҳнат дафтарчаси... Ўз аризасига биноан...».

Иш охирлаб қолганда, Қобилжон яна қабулхонада пайдо бўлди. Секретарь директорнинг бандлиги ва докладга тайёрланадётганлигини айтиб уни ичкарига қўймади.

— Бўлмаса мана шу қоғозни ўртоқ директорга бериб қўйсангиз.

Қобилжон букланган қоғозни секретарга узатди. Кейин пальтосининг ён чўнтағидан қоғозга ўралган бир нарса чиқазди.

— Буни ҳам бериб қўясиз-да, жуда зарур нарса.

Соат бешдан сал ошганда ходимлар директор кабинетига йиғила бошлади. Кўпчилик қатори Қобилжон ҳам ичкари кирди.

Мажлис у қадар расмий вазиятда ўтмади, директор идорадаги меҳнат интизоми ва муассасалардан келаётган алоқа хатларига ўз вақтида жавоб берилмаётгани тўғрисида гапириб, план бўлими ходимларини қаттиқ танқид қилди.

— Ундан кейин,— деди директор сўзини якунлаб,— баъзи ходимларимиз ишга ўтакетган даражада масъулиятсизлик билан қарайдиган бўлиб қолишли.

— Кимлар? Мисоллар билан айтилсин!— деди унинг сўзини бўлиб бош бухгалтер.

Директор қошларини кериб, кулумсираб қўйди:

— Мен, энг аввал, менинг ўзим, ишга масъулиятсиз қарайдиган бўлиб қолдим. Шу вақтгача ўртоқ Қобилжон Орифжоновга чора кўрмай, у билан муросасозлик қилиб келгандан...

Қобилжоннинг тепа сочи тикка бўлиб кетди. Қандай қилиб ўрнидан туриб кетганини, томоғини бўғиб турган галстугини бир зарб билан бўшатиб юборганини ҳам билмай қолди.

— Ўртоқ директор менга тухмат қиляптилар, саккиз йилдан бери шу идорада ишлайман. Шу саккиз йил ичида уч директор ўзгарди. Ҳаммаси билан жуда тотув ишладик, биронтаси менга на огоҳлантириш, на виговор берган! Одамнинг оласи ичида бўлади, деб шуни айтишади-да. Директорга қилган ёрдамларимнинг биронтасини бошқа кишига қилганимда итининг туваги олтиндан бўлиб кетар эди, бу киши яхшиликни билмаяптилар. Уялиш керак, ўртоқ директор, мендай мусиҷадек беозор кишини ранжитгани қандай кўнглингиз бўлди.

Ҳамма жим, директор тирноқлари билан столни чертиб ҳамон илжайиб турарди. Қобилжон директорнинг бу кайфиятини кўриб яна тутоқди. Бу гаплар унга таъсир қилмаётганини кўргандан кейин, овозини пасайтириб лўнда-лўнда қилиб гапира бошлади.

— Ўртоқ директор, сиз порахўрсиз!

Ўтирганлар ялт этиб бир-бирларига қараб олишди. Бош бухгалтер Қобилжоннинг сўзи ни бўлди.

— Кимдан, қачон, нима пора олган?

— Мендан,— деди Қобилжон,— ҳамма вақт пора олиб келганлар.

Бухгалтер, афсуслангандай директорга қаради. Директор эса ҳамон столни чертиб кулиб турарди.

План бўлимининг бошлиғи ҳам жаҳл билан:

— Наҳотки шу гапларнинг бари тўғри-а, ўртоқ директор?— деди.— Наҳотки сиз...

— Тўғри,— деди директор жиддийлашиб,— бари тўғри. Ўртоқ Орифжонов жуда

тўғри айтяптилар, давом этинг, ўртоқ Орифжонов.

Қобилжон дадиллашди. «Бу беномус, пораҳўрнинг пўстагини энди қоқаман» деган қатъий фикр билан сўзини давом этдирди.

— Қачон ва қандай нарса олгани маълум,— у ён дафтарчасини варақлаб, ўқий бошлади.— Шу йилнинг ўн учинчи октябрда бир эчки боласи билан. Яна шу октябрнинг йигирма тўртингчисида тўрт кило колбаса, байрам арафасида икки литр ароқ, тўрт кило сон гўшт, олти пачка «Казбек». Тунов куни бир керза этик, олти метр штапель... Э, айтган билан тамом бўлмайди!

Кабинет ичи сув қўйгандек жим. Бу жимликни директорнинг ўзи бузди. У ўрнидан туриб бурчакдаги пўлат сандиқни очиб, бир даста қофоз олди.

— Ўртоқ Орифжоновнинг гаплари тўппатўғри. Шу нарсаларнинг барини олганман. Бироқ буларни Орифжоновнинг ўзи сўрамасам ҳам зўрлаб берган, бу нарсаларга ҳали ўзим қўл урганим йўқ.— У қўлидаги қофозлардан бирини баланд кўтарди.— Соғин эчкини яслига бердим, мана акти. Ароқ, колбаса, гўшт, вино, папиросларга местком раиси Каримов билан акт тузиб магазинга топшириб юбордик. Керза этик билан штапелга ҳам акт қилинган. Местком советининг қарори билан этикни қоровул чол Ғани отага, штапелни уборшицизмиз Хайри холага беришди.

Директор шкафни очиб, қофозга ўралган нарсани олиб, стол устига қўйди.

— Бу нарса ҳам ўртоқ Орифжоновнинг

совфаси, нима эканлигини ҳали билмайман, бугун олиб келган эди. Ўзларинг очиб қўринглар.

План бўлимининг бошлиғи ўрнидан туриб қофозии очди. Ундан тўртта тухум, икки юз эллик сўм пул чиқди. Устида бир варақ қофоз ҳам бор эди.

— Ўқинг-чи,— деди директор.

План бўлимининг мудири ўқий бошлади.

— «Мени ўз вазифасини эплолмади деб бўшатибсиз. Совфа-саломлар ҳурмати, шу буйруқни ўз аризамга биноан деб ўзгартирансангиз, бундан буён яна хизматингиздаман... Қобилжон».

Ҳамма кулиб юборди. План бўлимининг бошлиғи қофозни жойига қўйиб Қобилжонга қаради.

— Хўш, энди нима дейсиз?

— Нима дер эдим, ўша айтган гапларимни айтаман-да. Майли, бўлар иш бўлди, иккита-тина илтимосим бор, бири — буйруқни ўзгартирилса, кейин, мана шу икки юз эллик сўм пулни қайтариб берсанглар.

Яна гуриллаб кулги кўтарилди. Бош бухгалтер қўл кўтариб ғовурни босди.

— Пул қайтиб берилмайди. Акт тузиб давлат ҳисобига ўтказамиз, буйруқни ўзгартириш мумкин. Ишни эплай олмагани учун эмас, пора бергани учун деб ўзгартирилади.

Ҳамма бир оғиздан таклифни маъқуллади.

Қобилжон пора беришда айбланиб ишдан ҳайдалгандан кейин, анча вақтгача кўринмай қолди. Бирор Қобилжон райторг мудирининг сигирини урчишишга олиб кетаётганини, бошқаси артель раисининг ҳовлисида унинг эчки-

сига тушган канани ихлос билан тераётганини ўз кўзи билан кўрганини айтди. Ким билади, ростдир.

Яқинда Навоий кўчасидан кетаётиб, карнай-сурнайли тўйга дуч келиб қолдим. Тақачилик артелининг раиси уйланаётган экан. Қобилжон беқасам тўн кийиб, олдинда ўйнааб борар, ҳадеб куёв бола — раисга қараб муқом қиласар эди.

ДАДАМНИНГ УРТОГИ

Эрталаб уйғониб девор соатга қарасам, еттидан ошибди. Ҳар куни худди шу вақтда дадам кроватимга энгашиб «Тур, кичкина Йўлдошев» деб ўйғотарди. Мен дарров турардим-да, нонуштадан кейин дадамниң «Победа»сида шофернинг ёнига ўтириб кетардим. Мактабга етканимизда, дадам: «Қани тушинг энди, кичкина Йўлдошев» деб, ташлаб ўтиб кетарди.

Ҳозир соат еттидан ошиб кетган бўлса ҳам, дадам хуррак отиб ухлаб ётарди. Бугун дам олиш кунимикин деб ўйлаб, девордаги календарга қарадим. Йўқ, иш куни. Ҳайрон бўлиб, ўрнимдан турдим.

— Қани, тез бўл, мактабдан кечга қолсан!— деди ойим, стол устига нонушта тайёрлаётганда.

Мен ажабланиб, ойимниң кўзига қарадим. Унинг кўзлари қизарган эди, роса йиғлаганга ўхшайди.

— Дадам...

Гапимни ҳам тугатмаган эдим, у мени боплаб жеркиб ташлади. Ойим доим шунаقا

қилади. «Ўн олти ёшга етмаган болалар катталарнинг гапига аралашмаслиги керак» деди. Нима, ўн олти ёшга етмаганлар одам эмасми! Қечки кинога ҳам киритишмайди. Театрга-ку, мутлақо йўл йўқ.

Қовоқ-тумшуғимни осилтириб, ўрнимдан турдим. Бир ҳисобда, дадамнинг ухлаб ётгани менга жуда яхши бўлди. «Победа»да бир ўзим маза қилиб кетаман.

Чойни ҳам ичиб бўлдим. Аммо шофердан дарак йўқ.

— Нима қилиб ўтирибсан, бунақада мактабга қачон борасан, жўнамайсанми!?

— Шошманг, ойижон, машинамиз келсин.

Ойимнинг кўзидан ўт чақнаб кетди. Ҳозир қулоғимнинг тагига бир тарсаки тушиб қолармикин деб ўйладим, йўқ, урмади. Қўлимдан силтаб, ҳовлига олиб чиқди-да, жўна, деб бақирди.

— Энди машина йўқ, даданг ишдан бўшаган.

Ўйлаб, ўйимга етолмасдим. Нега ўн олти ёшдан ошган кап-катта одам ишдан бўшайди? Нима ёмонлик қилди? Шу кун дарсда қандай ўтирганимни билмадим. Ҳеч бало миямга кирмади. Зўрға уч баҳога илиндим. Минг хаёл билан уйга келсам, дадам билан ойим қаёққадир кетай деб туришган экан.

— Телефоннинг тагидан жилмай тур, хўпми!— деб тайинлади дадам ва ойим билан бошлишиб чиқиб кетди.

Мен телефон олдида ўтириб, «Победа»да маза қилиб юрган вақтларимни ўйлай бошладим. Деразамиз тагидан кимдир ўтди, бўйнимни чўзиб қарасам, Каримов амаким ҳов-

лимизга кириб келаяптилар. Каримов амаким ўтган ҳафта Москвага кетган эдилар. Ўзлари жуда яхши киши, дадамнинг қўлида ишлайдилар. Бизниги ҳар келганларида, дадамга билдирамай менга шоколад, ойимга ё атир, ё капрон пайпоқ олиб келадилар. Ойимнинг туғилган куни бўлганда, тилла соат ҳам олиб келганлар. Каримов амаким шунаقا яхши одам, Москвага кетаётганларида бизнинг «Победа»да вокзалга чиққанлар, ўшанда менга матросча кўйлак, ойимга крепфантазия деган кўйлакли совға олиб келаман, деган эдилар.

Каримов амаким уйга киришлари билан, югуриб бориб, бўйинларига осилдим.

— Қачон келдингиз, амаки, Москвадан?

— Ҳозир, ҳозир поезддан тушдим-у, хўжайиннинг уйига югурдим-да. Ҳали уйимга ҳам, ишхонамга ҳам борганим йўқ.

Қоғозга ўроғлик нарсаларни олиб, стол устига қўя бошладилар.

— Мана совғаларни...

— Амаки,— деб, гапларини бўлдим,— дадам ишдан бўшаса, яхши бўладими, ёмон бўладими?

Каримов амакимнинг қисиқ кўзлари, йигирма тийинлик тангадек, дум-думалоқ бўлиб кетди.

— Нима дединг?

Мен дадамнинг ишдан бўшаганларини айтдим. Каримов амакимнинг думалоқ кўзлари, ели чиқиб кетаётган пуфакдек, секин-секин кичрайиб яна боягидек бужмайиб қолди.

— Матрос кўйлак олиб келдингизми, амаки? — деб сўрадим.

Каримов амаким, ўйлаб туриб, бош чайқадилар.

— Тополмадим.

Стол устидаги нарсаларни қайтариб, яна чамадонга жойладилар-да, «келганимни дадангга айтмай қўя қол» деб чиқиб кетдилар.

Кечқурун дадам «ҳеч ким телефон қилмадими?» деб сўради. Мен — йўқ, дедим.

— Каримов амаким келиб кетдилар, келганимни дадангга айтма, деб тайинладилар.

— Ҳеч нарса бериб кетмадими? — деб сўради ойим.

— Чамадонларини очдилар-у, кейин яна бекитиб қўйдилар.

Ойим жаҳл билан телефон номерларини терди.

— Каримов! Ҳой Каримов, мен... Тавба, отимни айтишим билан трубкани қўйиб қўйди-я.

— Узими?

— Ҳа, ўзи, Каримовман деди, отимни айтсам...

Шу кеча эрталабгача дадам билан ойим ухлашмади. Дадам ётган ерида папирос чекар, ойим йигламсираб гапиради.

— Каримов сизни орқангиздан участкали бўлди.

— Нима дединг?

— Каримов дейман, сизнинг орқангиздан...

— Гапингга тушунмаяпман. Нима деб алжияпсан.

Ойим анча вақт жим туриб, кейин бир хўрсиниб қўйди.

— Яхши одам экан деб, у ер-бу ерга телефон қилиб, тахта, тунукаларни сизнинг номингиздан тўғрилаб берган эдим.

Кўрпадан бош чиқазиб, гапга қўшилдим.

— Каримов амаким ойимга тилла соат совға қилганлар-ку!

— Жим ёт!— деди ойим, бақириб.

Дадам от пишқиргандек хўрсинди. Кейин йўталдими, акса урдими, билмадим.

Ойимнинг гапларига қулоқ солиб ётдим. Ойим жуда тўғри айтяпти. Дадам ишдан бўшамасдан олдин уйимиздан меҳмон аримасди. Каримов ҳар хил консервалар, конфетлар олиб келарди. Шоферимиз Каримов амакимнинг тўйларида маст бўлиб, калишини поймапой кийиб келгани эсимга тушиб, пиқирлаб кулиб юбордим.

Ойим яна жеркиб ташлади.

— Қап-кatta бола, бу нима, жинниларга ўхшаб...

Барибир, кўрпага бошимни буркаб, яна ўйлай бердим.

Каримов амаким участка қураётганларида бизникига жуда кўп келардилар. Ўша пайтлар мен ҳар куни шоколад ердим. Ойимнинг атирлари ҳам жуда кўпайиб кетган эди.

Ойим уҳ тортиб, деди:

— Бу Каримов ҳам расво, ёмон одам экан.

Дадам индамади. Фақат папиросни шундай тортдики, унинг чўғи кровать қуббаларини ялтиратиб юборди.

— Энди ўрнингизга ким тайин бўларкин?

Дадам индамади.

Ойим жуда ёлгончи-да. Жаҳли чиқса, шунаقا ёлғон гапираверади. Агар у ёлғончи

бўлмаса, ўзига шунча атирлар олиб келган, тилла соат тақдим қилган кишини расво, ёмон одам, дейдими?

Менга ойимнинг ўзи «Қаримов амакинг жуда яхши одам-да» деб айтган эди-ку. У айтмаса ҳам, ўзим яхшилигини билардим.

Шунақа хаёллар билан ухлаб қопман.

Эрталаб уйғонсам, дадам ҳали ҳам папироս чекиб ётарди. Ойим даҳлизда керогазни ёқолмай, ҳамма ёқни тутун қилиб юборибди. У жаҳлидан кўкариб, ҳадеб Каримов амакини қарғарди. Унинг бу ҳолидан Каримов амаким тилла соатни қистайди шекилли, деб ўйлаб қолдим. Ойим уйга кириб, косага тухум чақиб солаётганда сўрадим:

— Ойи, дадамнинг ўрнига тайин бўладиган кишининг ўғли борми?

Ойим менга шундай ўқрайиб қарадики, назаримда менга эмас, соатини қистаётган Каримов амакимга қарагандек эди. Мен қочиб, нариги уйга чиқиб кетдим.

Дадамнинг аризаси бир ёқли бўлгунча, Каримов амаким бизникига телефон қилмадилар. Орадан ўттиз саккиз кун ўтгандан кейин эрталаб роппа-расо соат саккизда телефонимиз жиринглади. Шу жиринглаганича кечгача жиринглай берди. Ойим негадир бўлар-бўлмасга ҳиринглаб куладиган бўлиб қолди. Дадам труккани олиб, қисқа-қисқа жавоб берарди. Қоқ пешинда Каримов амаким бир корзинка нарса олиб келдилар, эшикдан киришлари билан менга шоколад, ойимга крепфантазия тутқаздилар. Дадам ойимнинг қўлидан уни юлиб олди-ю, жаҳл билан Каримов амакимнинг олдиларига ир-

ғитиб ташлади. У шоколадни ҳам олмоқчи эди, шошиб оғзимга солиб, лиқ этиб ютиб юбора қолдим. Дадам қўлимдан ушлаб, нариги уйга олиб чиқиб, эшикни тақ этиб ёпиб қўйди. Кейин жаҳл билан қаттиқ-қаттиқ гапира бошлади. Эшикнинг тирқишидан қулоқ солдим.

— Сиз, ярамас одамсиз! Сизда виждон деган нарса йўқ! Кўзимнинг ёғии еб, бошимга иш тушганда қочдингиз. Яна ишга тайин бўлганимни эшитиб келдингизми? Боринг, кетинг, бу ердан. Сизнинг латта-путта совфаларингизга муҳтож эмасман. Болаларнинг бошини айлантируманг.

Каримов амаким дадамнинг кўзидағи ёғни еб қўйган экан-да, деб ўйладим. У киши жуда хафа бўлиб, чиқиб кетдилар. Дадам шундоқ яхши одамни хафа қилди-я, ачиндим.

Эрталаб дадамнинг «Победа»си келди. Энди дадам мени мактабимга, ойимни ательега «Победа»да олиб бормай қўйди. Тавба, ойим билан мен унга нима ёмонлик қилган эканмиз!

ҲАСРАТ

Маҳалламиизда бир кампир бор. Доимо эшигининг олдига шолча солиб, чаккасига райҳон тақиб, чой ичиб ўтиради. Ўтган-кетгани хотинларнинг қўлига чой тұтқазиб, гапга солади. Шу хотинни кўрганимда «Нима бало, қиладиган иши йўқми, невараларининг йиртиқ-ямоғига қараса бўлмайдими» деб дилимдан ўтказаман.

Бир куни ишдан қайтсан, кампир қўлидаги садарайҳон билан ўзини еллиб ўтирибди. Мени кўриши билан қўлимга шошиб-пишиб бир пиёла чой тутқазди. Қари нарса қўли қайтмасин, деб чойни олдим.

— Болам, сени ёзувчи мухбир деб эши таман! Шу ростми! — деди кампир.

— Шундай, она,— дедим кулиб.

— Оҳ, онагинанг айлансин, уйимдан илон чиққан! «Муштум»га ёзадиган гап бор. Болачақали одамсан, уч-тўрт сўм ишлаб қол.

Кампиршонинг нима дарди бор экан деб шолчанинг четига чўнқайдим. Кўчанинг нариги бетидан ўтиб кетаётган қўшнилар менга қараб, негадир илжайиб қўйишиди.

— Келинимдан ўтдек куйганман. Ўғилгинамни яхши биласан, қўйдек ювош бола. Келиним яшамагур уни ҳам расво қилди. Болагинамга эга чиқиб, бурнидан ип ўтказиб олди, бу доғули. Онаси ёмон хотин. Теги паст. Қудам кўчада эшак аравага тескари миниб, болаларга ҳуштак бериб, шиша йифади. Шундай одамларнинг боласи ким бўларди. Машойихлар «қазисан-қартасан, асли наслингга тортасан» деб билиб айтишган экан.

Кампир кўзига ёш олди.

— Ўғилгинамнинг бўйнига миниб олган бу жувон сўхта. Учта бўйига етган синглиси бор. Қарамайди. Топганини хотинига тиқиширади. Ўғлимнинг топганига бир маҳаллани боқса бўлади. Баракаси йўқ. Келиним ўлгирнинг ўзиям текстилда ишлаб, жарақ-жарақ пул олади. Билмайман, бу гумдон бўлгур, пулинни қаёққа қўяди...

Кампир шу саволни берди-ю, дарров ўзига-ўзи жавоб берди.

— Қаёққа қўярди. Ўлгурнинг айёрлигини қаранг. Ҳар хил гирдин-гирдишиндан посон-посон кўйлак тикириб, текстилнинг ётоқхонасидаги бир ўртоғиникига яшириб юар экан. Бу ердан исқирт кўйлагини кийиб чиқиб кетиб, у ерда посон бўлиб олар экан. Икки марта кетидан пойладим. Тилла соат ҳам олибди. Кеча атайин ишдан чиқадиган вақтини пойлаб бордим. Эгнига гунафша ранг помбарқут кўйлак кийиб олибди. Вой яшамагур дедим, ичимда. Бир тўполон чиқазиб, обрўсими учпул қилай дедим-у, яна шайтонга ҳай бердим. Ўйда бўйи етган қайни-

сийнилари бор-а! Ҳеч бўлмаса тул эгачисини андиша қилса бўлмайдими! Ўзи ўғлим ношуд. Хотинни-ки гаҳ деганда қўлга қўнадиган қилиб олмадими, · бундай эркакдан оғилдаги бузоқ яхши. Бу ер ютирилган бир «Муштум»га ёзинг. Текширгани келишса, кўйлагини бекитиб қўядиган ўртоғининг уйини кўрсатиб бераман.

Иидамай қулоқ солиб ўтираверсам кампирнинг гапи чўзилиб кетадиганга ўхшади. Ишим зарурлигини баҳона қилиб, ўрнимдан турдим. Қампир орқамдан жавраб қолди.

— Ҳой, «Муштум»да қачон чиқади? Яхшилаб ёё!

Қампирнинг келинини танир эдим. У комбинатнинг кўзга кўринган ип йигирувчиси эди. Газеталарда жуда кўп сурати чиқсан, хотин-қизлар қурултойига ҳам делегат бўлган эди. Шундай ишchan, топиш-тутиши яхши бу жувоннинг кампир айтганча ёмон кийиниб юришига ажабланардим. Наҳотки, қайнана-сидан беркитиб кийинса, наҳотки, кампирнинг гаплари рост бўлса! Бунга гоҳ ишониб, гоҳ ишонмай юрадим, яқинда ишдан қайта туриб, шу келин билан автобусда ёнма-ён ўлтириб қолдим. У сал хомушроқ кўринар эди.

— Ҳа, қўшни, нима бўлди? — дедим унга.

— «Муштум»га ёзмадингизми? «Катта мухбир» материал берган эканлар-ку. Ҳар кун «Муштум» пойлаб эсимиз кетяпти, — деди у пичинг қилиб.

Қампири тушмагур «сени «Муштум»га уриб шарманда қиласман» деб уни қўрқитмоқчи бўлганга ўхшайди.

— Шу гаплар ростми, ёлғондиров?!

— Ёлғон,— деди келин кулиб.

Автобусдан тушиб кўчамизга бурилдик.

— Кўйлак олсам «қайнисингилларингга нега олмадинг» деб жанжал қиласди. Қайси биттасига олай. Эримнинг топганига-ку онаси хўжайин. Тийинини бегона қилмай қизларига сеп йифади. Меникидан ҳам юлади. Невараларига едирмай-ичирмай лозимандага сарфлайди. Рўзғорни мен қиласман. Ўн бир жонмиз, ахир. Эридан ажрашган эгачимнинг тўрт боласи бор. Ўзимнинг уч болам. Икки қайнисингил. Қизлар на рўзғорга қарашади, на бирон жойда ишлашади. Сўлоқмондай бўлиб эртадан-кечгача сақич чайнаб, тош ойнанинг олдидан кетишмайди. Бирон жойга ишга киритиб қўяй десам, онаси кўнмайди. Эркаклар билан ишласа шарми-ҳаёси қолмасмиш. Уч боламга кийим оладиган бўлсам, эгачимнинг ҳам тўрт боласига олишим керак. Яқинда медаль билан мукофотланган эдим. Тақиб келган куним кампир севинчимни ҳам татитмади. Нега эгачингга ҳам олиб келмадинг, деб жанжал қилса бўладими, бу гапга кулайми, йиғлайми, ахир. Бор-э, деб кетиб қолай дейман-у, яна шаштимдан тушаман. Эримнинг ҳоли нима кечади, деб ўйлайман. Ўзи яхши йигит-у, онасига лом-мим деёлмайди-да. Индамай кириб, индамай чиқиб кетади. Ҳамма гапни мен эшитаман. Катта қизининг рўзғорини ҳам шу кампир бузган. Магазинда ишлайдиган топармон-тутармон бир йигитни ичкуёв қилиб, роса соғиб ичди. Ишдан бўшаб қолгандан кейин маш-маша қиласверди. Охири куёв бир сидра кийим билан чиқди-кетди. Бу

кампирнинг устидан қаёққа дод деб бораман, бирон жойда ишласа бошқа гап эди, ҳеч бўлмаса пенсия олгандаям-ку,райсобесга устидан арз қиласдим. Сира-сира менга кун бермайди. Ҳар ҳунар, ҳар соҳанинг министрлиги бор, бу кампирлар қайси министрликка қарап экан. Ўзинг ишлаб топганингга ўзинг эга бўлмасанг...

Келиннинг ҳам ҳасратидан чанг чиқиб кетди. У билан хайрлашиб уйга келдим. Ойим тоғарада нимадир кўтариб кирди.

— Сомса ёпган эдим. Томоғимдан ўтмади. Келиним бечора ишдан чарчаб келган, бирга ея қолай деб, атайни иссиғида олиб келдим

Шу пайт қўшни кампирнинг боласи «Муштум» сўраб чиқди.

— Бу кампир мунча «Муштум» сўрайди? Мен ойимга бўлган воқиани айтиб бердим.

— Бу ишга сен аралашма. Кампир мазаси йўқ аял. Толька келинини қийнагани-қийнаган. Маҳалладаги кампирларнинг обрўсини тўкаётган ҳам шу. Уззукун йўлакка ўтириб олиб, ўтган-кетганни исплетний қиласди. Кўрсанг ҳам кўрмасликка солиб кетавер, болам.

Ойимнинг гапига кула-кула ичкарига кириб кетдим. Қулоғимдан бояги келиннинг гапи нари кетмасди. «Бу кампирлар қайси министрликка қарайди, нодонлиги, қолоқлиги билан тинч рўзгорни татитмаётган бекорчиларнинг устидан қаерга, кимга шикоят қиласа бўлади?».

МУНДАРИЖА

Чўл бургути	3
Ўрик домла	28
Лочин	38
Муҳаббатнинг туғилиши	48
Севгингга содиқман	56
Ҳоливой	61
Муллажон	69
Порахўрнинг ўлими	74
Ҳом сут эмган танқидчи	79
Музикали воқиа	81
Узун тил	83
Дадамнинг ўртоғи	90
Ҳасрат	97

На узбекском языке

**Санд Ахмад
СТЕПНОЙ БЕРКУТ
Рассказы**

Гослитиздат УзССР — Ташкент — 1960

Редактор А. Ражабова

Рассом П. Бродский

Рассом редактори Г. Бедарев

Техредактор М. Парпихўжаев

Корректор Н. Содиқов

Басмахонага берилди 3/II 1960 й. Босишга руҳсат этилди 11/III 1960 й.
Формати 70×92^{1/2}. Босма л. 3,25 Шартли босма л. 3,80
Чашр. л. 3,8 Тиражи 15 000. Индекс н/а. Р 06211 УзССР Давлат
бадинй адабиёт пашриёти, Тошкент, Навоий кӯчаси, 30.
Шартнома № 208—59.

ЎзССР Маданият министрлиги Ўзглавииздатининг 1-босмахонаси
Тошкент, Ҳамза кӯчаси 21, 1960. Заказ № 93. Баҳоси 1 с. 15 т.